

KULEMUHA LIZAZI

LA HAO NI LIÑUSA LATENI

 Ki kakusasana, balikani. Halu yemeñi ona cwalo fa nako nyana.

Mulimu yomunde, luna cwana, mwa kufilika ni kupateha kwa bupilo kwa, lu kutumani ka mizuzu yetatama yelikani ye kamba hola, kamba seo kaufela si kona kuba sona, ili zeo Wena ulufile, kuli lutise tumbo ni kanya ku Wena, ka ku kutaza Linzwi la Hao, kuli lu Ku zibe hande, ki kabakaleo halu kopani kakusasana cwana. Lwa itumela ku Wena, Mulimu, bakeñisa kuli kuna ni batu baba itukisize mi ba ipakaanyize ili bona kutaha ni ku to teeleza. Hakuna taba ka buino ni nako, ni ze pupila ku zona, ba sa lumela. Mi lu itumela ku Wena ka bona.

² Mulimu, lu itumela ku Wena ka mata a Hao amatuna a ku folisa, lisepiso sa Linzwi la Hao. Ka mo lipilu za luna li ciseza ha lu utwa bupaki boo! Matata a mifuta kaufela a beilwe fa bana ba batu! Wena, ni muhau wa Hao ni mata, ni ka sepiso ya Hao, u ubafolisize. Mi bateni mo, ba paka, banze bafa tumbo ku Mulimu. Lu itumela ku Wena ka se.

Mi cwale lu eze kuli, kacenu, lu utwe Liñusa leo U lu lukiselize mwa hola ye. Halunze lu bala mwa Linzwi la Hao, mi U lufe cwale makalelo a taba a se lubala. Tuhela tato ya Hao ku ezahala mwa lika kaufela, kakuli lu kupa ka Libizo la Jesu. Amen.

Mwakona kuina.

³ Ki litohonolo fa kuba mo kakusasana cwana. Ni tabile hahulu ka mina kaufela. Mi Muzwale Wood, Muzwale Roy Roberson, mizwale yemiñwi babañata, ba sebelize ka ku sepahala mwa mazazi amabeli a fitile, kwa kubeya lipangaliko ze fukisa moyo mwa tuyaho woo ka mulelo ona wo, kakuli la Sunda yefelile ne ba boni mo ne mu nyandezi. Mi neba nami kapene nyana mwa sikuwama sa keleke, mi ba yo sebeza kuli lika ze libeleke ni kuli mube mwa mbombolelwa, ka mashheñi one mu beya mwa koleko, hamunze muinzi cwalo, ni ku teeleza kwa Liñusa. Ku batile kwateni kacenu kufita mone kuinezi sapili. Kacwalo lu itumezi ku Mulimu, ni ku mina sicaba, ka kolo yee.

⁴ Ki tabo... Muzwale Roy Borders, na tabela kuinela kwa mulaho kakusasana cwana. Mi Ni mu bulelezi kuli ange sipula sa hae mi ainele kwanu ni bakutazi ba, kono u hanile kueza cwalo. Sina mina kaufela ha muziba, Muzwale Borders wa lu yemelanga mwa simu. Ki tabo luli kuba ni Muzwale Borders mwahala luna, ni bakutazi babañwi babañata ni balikani.

⁵ Mwahala sunda mutumbi Ni—Ni nahananga, ni kubulela kuli, “Ha Ni fita kulo kwani, la Sunda, Ni ka yo lemuha mukutazi kaufela, mutu kaufela.” Mi cwale ha ni fita kwanu, mu swaliwa hahulu mwa Liñusa kufita mu libala fela lika kaufela, bukaufi cwalo, ka mo ne kuinezi.

⁶ Cwale Ni lukela kuya kwa Arizona. Ni na ni kuya teñi la Mubulo leli tatama, ki biki, kukutela kwa Tucson, kuli niise banana kwa sikolo. Mi Ni ka yo kuta kasamulaho wa sani. Mi musala ka una ni kuba kwani ka ku itahanelo, kuli ba yo kala . . . ku yo ñolisa banana, lisunda zepeli likolo li si ka kwalula kale. Mi Nina, kasamulaho, Ni ka yo kuta fa nako nyana kwanu.

⁷ Mi cwale ye kona nako ya ku pumula kwa ka. Sina ha mu ziba, Ni kutalize kuzwa ka kweli ya Ñulule; Sope, Yowa, Liatamanyi, Lungu, Kandao, Mbuwana, ni Sikulu. Cwale, haiba Mulimu wa lata, mi hakuna nihaiba pizo ya butokwa, ye ki nako ye Ni—Ni—Ni banga ni ku katuluha kwa ka, pumulo yaka. Ni ya kwa kuzuma. Mi Ni . . .

⁸ Cwale haiba Mulena uka ni bizeza ku sesiñwi fela, lika zani haliyo mwa siswaniso. Mulimu ki wa pili kamita. Mi Ni bata Yena kuba wa pili, mi mu bata kuli Yena abe wa pili. Kono cwale haiba hakuna pizo yeñwi, mi yeo ikaba tato ya Hae, sani kona se Ni lukela kueza cwale mwa likweli zepeli ze tatama, ki ku yo zuma cwale, ku yo i katulusa. Ni . . .

⁹ Ha mu lemuhi, lifasi halina kuziba, seo Ni na ni kufita ku sona. Mwabona? Mi ki mukatalo fela luli. Ki kabakaleo Mulena na bulelezi balutiwa ba Hae, fani ha Na zamaya ni bona, “Kutaha kusili mwa lihalaua, ku pumula nyana.” Mwabona? Ni lemuha seo hahulu, zazi ni zazi, mi sihulu mazazi aka aba amañata mwa lifasi, mwa bona. Haniya Ni supala, mwa lemuha cwalo. Mwa utwa mulisana wa luna ha bulela kuli “amen” ku sani, ni yena. Yena, luna, lwa kona kulemuha kuli ha lu sali bashimani kasamulaho lumano fitelela myaha ye mashumi aketalizoho a kupepwa. Cwale luna ni kuba ni nako nyana.

¹⁰ Lu itumela hahulu ka bupaki bo lu sa zo utwa. Musala ka na inzi ku musala Bo Wood, maabani, mi batu babañwi ha ba taha kuzwa kwa Alabama, neku leliñwi kwa neku lani, mi na sweli kubulela lika zetuna za na ezize Mulena mwa mukopano wani, ka banana ba banyinyani bene ba foliswa, ni lika ze shutana. Mi ni lika zeñata cwalo, mawi, ne kuka nga fela nako yetelele fa—fa kubulela lika zeo.

¹¹ Mi hape Ni na ni kuhupula kuli . . . Ni lumela kuli babañwi ba kubona ne ba Ni bulelezi kuli Kezeli Larson ubile kwanu fa Lisunda zepeli ni mbututu yomunyinyani. Hani koni kuziba, kono Ni lumela kuli ne ba bulezi kuli neli muikulyae, mwendi, kwa ku mu neela, kutaha ni yena kuzwa kwa Chicago. Kalibe yani ubile ya musa hahulu ku luna, mi lwa itumela ku yena. Mi atisa mbututu yomunyinyani kuzwa kwa Chicago, ku to mu

neela. Zeo, una ni nako nyana ya ku muisa, Na sepa, kwa ku to mu neela, kono uiselize ngana ka za mwanana yo kuli a neelwe ku Mulena. Konakuli haiba Kezeli Larson wa lata, hanze Ni bulela, haiba wakona kutisa fela mbututu yani kwa sebelezo ya ku mu neela ye.

¹² Mi cwale, mwendi, hasweli ku itukisa kutaha, Ni—Ni bata kubulela kuli le libile Liñusa le li tata hahulu le Ni kile na lika kulukisa, konji kuto fita maabani busihu. Mwahala biki kaufela, Ne ni kena mwa muzuzu, kulika kuina kwatuko kasamulaho wa lipizo ni lika zeñwi, ku—ku lika kuba ni sesiñwi mwa munahano waka ka hola ye. Mi ha Ni ya, Ni—Ni palezwi mane neba... Muhupulo waka noli fela mukungulu. Mi, maabani, Na kena mwa muzuzu wafafasi. Ne ni hupula kuli ne ku cisa hahulu, kacwalo Na kena mwa muzuzu wa mwatasi, na inafafasi mwani. Mi Na lika kunga Bibele ya ka ni kubala, kipeto Na wela mwa buloko. Kipeto Na zuha ni ku nwa mezi, ni kulika ku i canganisa cwalo, ni kuzwela fande ku yo zamaya zamaya, ku yo ina fa mahatelo a kukena mwa ndu.

¹³ Yomuñwi ataha ku to ni swala kwa hembe, inge niinzi fa mahatelo fa ku kenela; ne ku cisa hahulu. A ni kobeta. Ne ni sa zibi kamba na nyanganyize lizoho ku ni kobeta... Yomuñwi, neika ba yomuñwi kwanu wa mwa muleneñi wo, kamba mwendi neli yomuñwi fela mwa keleke, yana ni kobeta. Mi Ne—Ne ni sweli ku nahana hahulu, Ne—Ne ni talimezi fela ka mubeu fa mota, yene fita. Na kobeta.

¹⁴ Maabani busihu ne Ni kwezi mota mi se ni ya kwa Charlestown, kulika kuba ni sesiñwi. Mulena, na bonahala inge, na bata ku ni bulelela nto yeñwi, kono Na... Satani na lika ku ni yemela mwa nzila, ku ni hanisa kueza cwalo. Kacwalo Na hupula kuli, “Kihande, haiba uka eza cwalo, Ni ka zwelapili fela ku liyeha, ku zwelapili fela ku libelela, ku ngongota fa sikwalo kufitela A kwalula.” Kacwalo he kasamulaho wa mizuzu nyana, kamba mwendi kasamulaho fela wa sebene kiloko kakusasana kacenu, Na zuha ka mapakela luli.

¹⁵ Maabani, kakota nyana, kulika... Ne ni cile mbonyi ye ne si ka lumeliana nina hande, kakuli ne i cisa hahulu, mi Ne—Ne ni lika kuba kwahule ni zona. Mi—mi he kakusasana wo, mwendi ka eiti kiloko, Na to fumana Liñolo lene li ni komokisize. Mi Na talima fa Liñolo lani hape, mi hape La ni komokisa. Mi Na ya, ku Li latelela hande mwa Mañolo, mi kona Ni sa zo feza fela mizuzu yelikani kwa mulaho. Konakuli hakulata Mulena una ni Liñusa la luna, kakusasana cwana, leo Satani usweli kulika ku lu amuha.

Kana wakona kutisa mbumbu yo kwanu, Kezeli Larson? [Muzwale Branham uneela mbututu. Hakuna manzwi fa tepu—Mu.] Mulimu abe ni bona mi a ba tuse.

¹⁶ Cwale Ni mi inisize, Sunda yefelile, mazazi amabeli, mi Ni nahana kuli...kamba, lisebelezo zepeli, kakusasana ni manzibwana, mi seo sa mi tatafalela. Ne ni utwisisa kuli sani... Babañwi ba mina mulukela ku ya kwahule hahulu, ni ku mbwinja lizazi lililiñwi kwa musebezi, ni zeñwi cwalo. Cwale ni ha lu ka zwa la Sunda, la Mubulo, biki, Ni ka zibahaza fela sebelezo ya la Sunda yetaha, haiba Mulena alata, mwabona, konji haiba kopano ika bata kuli iine cwalo kuisa busihu. Mwabona, sani, fo ku itingile...Kuna ni babañata hahulu ba mina!

Ki babakai baba ka tabela kuli kube cwalo busihu bwa kacenu, halu boneñi, lube ni lisebelezo busihu bwa kacenu? Cwale, kamba lube ni zona ka Sunda yetaha, mu manule mazoho a mina ye taha? Ooh! Mawi, yani ifa kaufi hahulu. Uh! [Yomuñwi ubulela kuli, “Ki mupateho, muzwale!”—Mu.] Muli cwani? [“Kuba ni yona ka linako zepeli.”] Uh! [Muzwale Ben Bryant uli, “Lube ni zona busihu bwa kacenu, ni biki yetaha, hape, Muzwale.”] Cwale, cwale, Ben! [Muzwale Branham wa seha.]

¹⁷ Nina ni Liñusa le, ki lelitelele, kakusasana cwana, kono Ni—Ni sa zibi mwa ku ezeza...Mi Na ziba Na tusanga kwa kueza milao ya keleke, kono mwahali mwani, haiba muka lemuha, Ni bulezí kuli, “Kwanda kuli Na tepiña.” Mwabona? Konakuli, ye ya tepiñiwa. Uh-huh. Konakuli mwendi luka lika kuba ni linako zepeli cwalo, busihu bwa kacenu ni ka la Sunda yetaha, kanti, luka eza cwalo haiba Mulena wa lata, mwa bona. Cwale, haiba mu sa bi ni liñusa mwa biki ye, konakuli mutahe ka la Sunda yetaha.

¹⁸ Nina ni kuba ni mina kuli mutahe habeli ona cwalo, kono Ni ikutwa kuli haluna sibaka kwanda nako yelikani fela. Mi muhupule fela, haiba nako ika zwelapili cwalo, haluna kubanga ni litohonolo le fa nako yetelele. Mwabona? Muhupule, kuna ni se si ka ezahala. Ikana ya ba kuli mulao uka lu paleliswa, kamba Satani uka zamaya mwahala mina ni ku mi hasanya. Fela kamita kubanga ona cwalo. Mwabona? Kuna ni se si ka ezahala, kacwalo ha lu itumeleñi ka muzuzu kaufela o luba hamoho.

¹⁹ Cwale he ku baba na ni kuya kwa mandu a mina, busihu bo, kuka ba inge busihu bwa Sunda yefelile, Ne nina ni fela—fela Liñusa le li kuswani. Mi cwale, mina, haiba mwa li bata fa tepu, kupalañi, luka mi lumeleza yona tepu yateni haiba muna ni kukutela kwa malapa a mina. Halu yo...Ni ka kutaza busihu bwa kacenu, haiba Mulena a lata.

²⁰ Neni nani kañolo maabani, kamba—kamba maloba, neli Liñusa nyana lene Ni ñozi kuzwa kwa kupuzo yeñwi cwalo, mi ki ya kale luli. Kuna ni Mañusa amabeli, ni hakuli cwalo. Li bonahala kuba la mwahali, leliñwi la ona ki kuli, “Lisima le li tibukile,” mi leliñwi, “Kucalela mwa moyo ni ku kutula

kakundukundu,” ki Liñusa fela la Evangel. Kakusasana wo ki tuto. Mi kacwalo, busihu bwa kacenu, Ni ka tokwa kubulela fa, “Kucalela mwa moyo ni ku kutula kakundukundu,” kamba mwendi, “Lisima le li tibukile.”

²¹ Mi, kakusasana cwana, Ni bata kubala mwa Litaba ze Kenile cwale.

Mi kana mwa ikutwa hande njí? Muli, “Amen.” [Kopano ili, “Amen.”—Mu.] Kihande.

Cwale Ni bata kuli mina, mwa Libibeza za mina, mu sikuhele ni na mwa Buka ya Hosea, mina baba lakaza kubala. Mi ha lu baleňi litimana nyana zelikani kuzwa mwa kauhanyo ya 6 ya Buka ya Hosea, mupolofita.

Mi ha lu yemeňi.

²² Mulimu yomunde, ha lu swaneli kuswala Buka ye mwa mazoho a luna, kakuli lubala mwa Mañolo kuli hakuna mutu mwa Lihalimu kamba mwa lifasi, kamba mwatasa lifasi, yana swanela nihaiba kunga Buka, kamba nihaiba kutilima ku Yona. Oh, mi kwa taha Alimuñwi yana swana inge ngunyana ye tabilwe; A to nga Buka, kakuli Yena na swanela, mi A mamulula Maswayo a yona. Mi lu talimela ku Yena kakusasana cwana kuli apatulule litaba za makalelo zona ze ñozwi mwa Buka, kakuli ki Buka ya Kuliululwa. Kaufela baba liuluzwi ba ñozwi mwateni. Lukone ku fumana siemba sa luna, kakusasana cwana, mwa nako ye lupila ku yona. Kakuli lu kupa ka Libizo la Jesu. Amen.

A mutahe cwale, lu kutele ku MULENA: kakuli ki yena ya lu holofalize, mi ki yena yaka lu folisa; u lu natile, mi uka lu tama fa litombo za luna.

Kasamulaho wa mazazi amabeli uka lu pilisa: ka lizazi la bulalu uka lu zusa hape, mi lu ka pila fapila hae.

Mi luka ziba, haiba lu ka isa lipilu za luna kwa kuziba MULENA: kutaha kwa hae ku tiile sina masa ha patalala; uka ta ku luna sina pula, sina pula ya maseulo ni ya maungulo ha ikolobisa naha.

Wena Efraimi, Ni ka kueza cwani? Wena Juda, Ni ka kueza cwani? kakuli lilato la mina liswana sina mbundu ya kakusasana, ni sina puka ye oma isali kakusasana.

Kabakaleo Ni ba natile ka bapolofita; Ni ba bulaile ka manzwi a zwile mwa mulomo wa ka: mi ku atula kwaka ku bonahezi kapili sina liseli.

Kakuli Ni lata sishemo, mi isi sitabelo; ni tabela zibo ya Mulimu kufita matabelo a kucisa.

Kono bona basinyize bulikani: mi mwateni—mi mwateni ba ni ezize ka bupumi.

Giliadi ki munzi wa ba baeza bumaswe, mi u itambile mwa mali.

*Sina sitopa sa malengwami ha si lela mutu, ki mo si
inezi sitopa sa baprisita baba bulaya batu mwa nzila ya
sikemi: ee... ba ezize ze maswe.*

*Ni boni se si sabisa mwa ndu ya Isilaele: mwateni
kubonwa buhule bwa Efraimi, Isilaele u silafalizwe.*

*Ni, Wena Juda, u lukiselizwe zo ka kutula, nako ye Ni
ka kutisa sicaba sa ka mwa butanga.*

²³ Mulena Jesu, ikungele ku Se, ka Moya o Kenile wa Hao, makalelo a taba ka mwa lukiselizwe, halunze lu libelela ku Wena. Ka Libizo la Jesu. Amen.

²⁴ Cwale, tuto yaka kakusasana wo kikuli: *Kulemuha Lizazi La Hao Ni Liñusa Lateni.*

Lu bona kuzwa mwa tuto ya la Sunda yefelile, sina hane lu lutile kaza, *Mukiti Wa Litolombita*. Mi Ni bata ku bizeza kutwisiso ya mina, cwale, ka nako—nako ya Isilaele mwa nako ya Mulimu.

²⁵ Kacenu lu talimana ni tuto ya sikolo sa la Sunda cwana, kuli Ni bata kuli mulemuhe ni kuziba nako ye lu pila ku yona. Lu se luli bukaufi ni ku feza, sina ha mubona. Mi he, ka se, mulukela kuziba hola yateni ni nako, ni sisupo ni Liñusa le mu lukela ku amuhela.

²⁶ Cwale, sina hane lu kalile la Sunda yefelile... Lubile lu bulela ka za kuli luka kutaza fa Litolombita, zona Litolombita ze Sebene za mafelelezo za Bibele. Mi na, na kasibili, Ne ni hupulanga kuli lika bonahala mane inge Maswayo. Kono Ni lemuhile ku yeñwi ni yeñwi kaufela ya kukwaluha kwa lika ze kubile kubanga lika za buipiteli hahulu.

Mi sina hane lu kutilize ka za *Linako Za Likeleke Zesupa*, mi ne li petehile hahulu ka ku swalisana kufitela Moya o Kenile yena Kasibili ataha fafasi mwahala luna ni ku lipaka, ni ku libeya fa mapampili, ni ku li yumbela kwa buse bwa na, ni ku li bonisa fa kweli mwa lihalimu, ni ku li paka ku luna, lisunda ni likweli li si ka ezahala kale, kuli kona fela nzila ye si ka ezahalela ka yona, ka kupetahala. Ona mwa tabernakele mo Na li zibahalize. Kwanu kwa... mwa nako, Na li zibahalize. Fa kweli ni lizazi, Na li zibahalize. Mi mwa sibaka sa linaha ka nako ye, Na li zibahalize; sina mundandwe wa Rome ha no zwile ni kukutela kwa Palestine, ni sepa na li yena yana swanela kuba popu wa pili kukala lili koo (sina haba bulela) bali Pitrosi nali yena popu. Cwale, neli nto ye tabisa hahulu yeipitezi!

²⁷ Mi, lu bona kuli, ku sika taha kale Maswayo a Supa ana patile likunutu kaufela.

Na ni sa zibi sene Ni swanisa fa limati, ka Linako za Likeleke. Nali kuba. Mulimu wa ziba. Ka pono fela, Ne ni si swanisize. Ni sa zibi kuli Mulimu, silimo ni likweli ze silezi kasamulaho, na ka si paka mwa mbyumbyulu, ka kweli, ni ku si

patalaza mwa mitende ya na ha. Ne ni sa zibi sani. Ne ni sa zibi kuli ne ku kaba kunutu ya ku unsufala kwa kweli, ku yemela ona Lusika lwa Laodesia loo.

²⁸ Cwale, mwa mitende, muka fumana fela masika a silezi. Kakuli keleke ya Laodesia ne i unsufalile hahulu kaufela yona. Mi haiba mu ka lemuha buino bwa moyo, sina Mulimu mwa li beezi mwa lihalimu. Ha ne Ni si bonisize mwa lifasi mo, Ne ni sile sibaka nyana, sina mo mu bonela, kaemba nyana fela ka liseli. Fani neli fela ona fani Baketwa ba si ka bizwa kale kuzwa mwa lifasi, kona libaka lene Ni i ibeezi mwatemi mwani mwa keleke ya bu supa. Kono cwale Mulimu hana i beile mwa mbyumbiyulu, ne i unsufalile ka kufeletelela, kutalusa kuli mwendi wa mafelelezo sa bizizwe kuzwa mwa Lusika lwa Laodesia lwani. Ha lu zibi. Kwa kona kuba kutazo fateni.

²⁹ Cwale mulemuhe hape, ku sikaba kale—kale Maswayo a Supa, ao Ne ni sina zibo ya ona ka kuba cwalo.

Kwanu kwa tabernakele Na bulezi ka zona, mi ani lumela kwa Tucson, Arizona, ku mi bulelela kaufela ze ne ka ezahala. Mi kuna ni baana babali teni ona mo cwana, kacenu, bene bali teni kwani kubona ni ku iponela ha li ezahala, “Mangeloi a Supa ataha.” Mi mitende se i patalaza sani, ni mapampili a makande, mwahala na ha kaufela, “Sikwenda sa Liseli la kunutu sipangeha mwa mufuta wa piramidi,” inge fela mo ne Ni swaniselize ni ku si bonisa ku mina. Ku nanuha kuzwa fo ne ku yemi Mangeloi ani, ni kukambama limaili ze mashumi amalalu mwa halimu, ni limaili ze mashumi amabeli ka zesupa mwa bukima; kamba ni limaili ze mashumi amabeli a zesupa mwa halimu, ni limaili ze mashumi amalalu mwa bukima, Ni libezi kuli neli cwani. Mi ne si bonwi mwahala linaha kaufela, fahalimu fela a Tucson, Arizona, kona ko ne li ezahalezi, nako yeswana.

³⁰ Mwabona, a—a Bibebe, Mulimu ha yo ka . . . Se ha ki sika sa lika fela mutu ku—ku cocomeza ku mina, kono ki ku patulula ku mina yona miinelo luli ya moyo ya hola ye.

³¹ Mi cwale, Liñusa le litatama, lene li kwaluzi Maswayo a Supa, lene li tatuluzi likunutu kaufela ze patilwe za Bibebe, zona Lituto, ni zeñwi cwalo. Zeo mane, lifasi la kacenu lisweli ku lwanisa ha butuku mwa mazazi aa, la Li lwanisa ni kubulela kuli Li fosahalile, *se, sani*.

³² Kwanu lizazi leliñwi mwa Arizona, ne ba kopanya matepu, ka kulika kueza kuli ni bulele lika zene Ni si ka bulela. Muhipule fela pono kaza mulelo wa Arizona! Bibebe ibulezi kuli, “Ne kuba hande kuli mube tameelwe licwe mwa mulala.” Mi nto yeñwi, kuli, “Yo kaufela,” abe mukutazi kamba sikamañi kaufela sa kona kuba sona, “yaka nga Linzwi lililiñwi kwa Teni, kamba ku ekeza linzwi ku Lona!” Batu ba beya toloko ya bona bañi kwa Linzwi sina mo Li fezwi, kulika ku Li bulelisa nto isili yene Ni si

ka bulela, mi, ha ki Linzwi laka; Ki Linzwi la Hae. “Ya ka ekeza kwateni, kamba kuzusa kwateni!”

³³ Mi cwale, mwa pono, lu boni bapolofita bani ha ba taha fafasi, sina hane Ni tatuluzi ku mina, Na lumela, ka Lisunda nyana za kwa mulaho. Kaufela ne likaba cwalo. Na li, “Mube fela kwahule ni zona.” Ibile fela Na li lwanisa, konakuli kipeto Mulimu hana ku li lwanisa. Kono ha lu Mu tuheleñi abe no zona yena kasibili. Ki Yena Ya li tokomela. Mwabona?

³⁴ Cwale ne lu lemuhile, Sunda yefelile, neku nani... kutaza ka mazazi a mukiti. Mi ne kuna ni mukiti wa pentekota. Mi mwahala mukiti wa pentekota ni mukiti wa litolombita, yani neli nako yetelele; neli mazazi a mashumi aketalizoho mwahala pentekota ni mukiti wa litolombita. Ni mazazi a mashumi a ketalizoho, ao, *pentekota* i talusa kuli “mashumi aketalizoho.” Neli kufefulwa kwa lukau, kamba kubona-... Mitamu ya kutulo ne itiswa mwateni. Mi lubona kuli nelili mwa mifuta kwa mulaho kwani, ka miselo ya nama, ku yemela mitamu ya pili ya Moya o Kenile yene ka suluhela fa sicaba.

Mi lu fumana cwana, kasamulaho, kuli mazazi a mashumi aketalizoho ani na amuhezwi ki Bamacaba, mi, “Mulimu a biza kuzwa mwahala Bamacaba sicaba sa Libizo la Hae,” kuli mukiti wa pentekota. Mi lu se lu fitile ku zeo za mukiti wa pentekota.

³⁵ Cwale, kaniti, kuzwa mwa mazazi a mashumi aketalizoho, ku kaba li sabata ze supile. Mi lisabata se supile ne li yemela Linako za Likeleke Zesupa, kuli li bizwe mwa linako za mukiti wa pentekota, wa Pentekota, kuli abize sicaba kuzwa mwahala Bamacaba sa Libizo la Hae.

Cwale, kwa mafelelezo a lisabata ze supile ze, ze se bile teni, ne ku lukela kuba Lizazi la Swalelo, ili zona Litolombita Zesupa. Mi Litolombita Zesupa ne lina ni kubiza lizazi la sililo, kukutela kwa Sitabelo, kamba, yona Swalelo. Mi lu fumana hape, kuli, Isilaele, zani Litolombita Zesupa neli za Isilaele fela.

³⁶ Mi, he, ki kabakalañi ha Na ni lumelelize ku kutaza ka Litolombita Zesupa zani. Mane ne ni li ya itukisize ku zibisa ka zona, ne ni lukisize kale miyaho kaufela ni lika kaufela za kuya ku zona, kuli ni kutaze ka Litolombita Zesupa. Mi se Nili, “Kuna ni se si ni kataza hahulu,” Se nili. Lwa tundamena ku beleka, mi Billy ni luna kaufela, lu lika kulukisa lika kaufela za muyaho ona ni ze fukisa moyo, mwa biki yetaha ye, kwa Litolombita Zesupa; lukaba ni mazazi a lishumi, kamba mazazi a ketalizoho ka amalalu, ne luna ni muyaho wa sikolo. Kono Moya o Kenile no si ka ni lumeleza kueza cwalo, bakeñisa buino bobuñwi, mi Na komoka kuli ki kabakalañi.

Mi hane Ni kena ku yo lapela, Na bulelala musala ka kuli, “Ni yo kena.” Mi ka ku sepahala Na kubama fafasi fapila Mulimu, ku lapela. Mi A ni patululela kuli Litolombita Zesupa zani ne li lizizwe mwataswa Liswayo la Busilezi, mi Ni se ni kutilize

fateni, kuya ka moyo. Mwabona, ki lizoho la Mulimu, kona taba kaufela. Ki ze amana ni Isilaele, mi ne lu li shituzi mwatasa Liswayo la Busilezi; mina kaufela babana ni yona, ka mwa na bezi manyando a Majuda.

³⁷ Nako ya Bamacaba ibile mwa mukiti wa pentekota wo.

Litolombita, mwatasa . . . kaufela zona ne li lizizwe mwatasa Liswayo la Busilezi. Mi ne lu i shituzi Sunda ye felile, mwatasa mukiti wa litolombita, haiba kaufela mina mubata ku i teeleza. Ne i lukela kueza sikamañi? Ku matissa Majuda, kuzwa mwa libaka kaufela za lifasi, kukutela mwa naha ya habo bona. I lukela kubela ona kwani. Mi ku kwaluha kwa Maswayo, mwatasa Liswayo la Busilezi, ni mwatasa . . . Litolombita Zesupa ne li lizizwe mwa—mwa Liswayo la Busilezi.

³⁸ Cwale, Liñusa la lingeloi la bu supa ki ku kwalula kunutu ya Maswayo, ku biza ba beleki ba nako ya maungulo Bamacaba kuli ba amuhele tifo yeswana yene ba amuhezi babeleki ba hola ya pili. Mwabona?

Cwale, Jesu na i lutive. Na bulezi kuli ne kuna ni batu bene ba ilo kutula. Ne ba keni musebezi. Mi hane bali cwalo, ba kakusasana hahulu, ba amuhela e—e—e nako, pene ya lizazi mutumbi. Mi cwale ka nako ya musihali, yomuñwi ataha mi ato sebeza. Mi cwale ka hola ya mafelelezo, yani ki hola ya mafelelezo mwa lizazi, mutu yani ataha mi ato amuhela tifo yeswana yene ba amuhezi ka hola yapili mwa lizazi lateni; hola ya maungulo.

³⁹ Ku petahalile hahulu, kuya ka mo balumiwa ba Linzwi ba hola ya pili, ni Evangelii, ni Niti, mo ne ba kenezi ka Lizazi la Pentekota lani. Mi se kutaba lusika lwa lififi lone lu ba kwalezi kwande. Mi ka nako ya musihali, Luther, ni Wesley, ni babañwi, ba kena mwateni. Mi ku lukela kuba ni Liñusa la nako ya manzibwana, ni ku amuhela nto yeswana yene ba amuhezi kwa simuluhu. Liñusa la nako ya manzibwana ki ku kutiseza hape, kutisa yona taba yeswana yani hape.

⁴⁰ Mi muhupule pono ya biki yefelile, kuli Munyaliwa hanatile ku to ba . . . mubonahalelo wapili wa hae. Se kutaha Munyaliwa yomunyinyani, ya lateha, mwa pono. Mi Na, nekusina nihaiba ku nahana ka zona; ne niinzi fande fani inge ni buha. Mi ki ha se kutaha Munyaliwa. Na utwa Linzwi kwa matuko ni na, lali, “Ki wo mubonahalelo wa makalelo wa Munyaliwa.” Mi ki Ha to fita. Na Mu bona, ka mwa Na bezi, ya lateha luli, yomunde, mwanana. Na sweli fela ku zamaya ka muhato wa Na lukela kuba ka ona, isiñi kucaula; mwa muzamao fela wa—wa musali, mo ba zamaelanga ka musa, mukwa wa kalibe. Kona Mwa na zamaela, inza taha kwa *neku* la nzohoto, mi ki Ha ya kuzwa mwa meto a ka.

⁴¹ Mi ki Ha ni sikululela kwa *neku* la silyo, mi A ni bonisa keleke ni keleke mo ne li tahela kuzwa mwahala masika. Mi, oh,

ka mo ne li bonahalela butanya! Mi wa mafelelezo neli wa lusika lwa lizazi la keleke ya mafelelezo, ya na eteletwa ki muloi. Mi ne ba tinile ka butanya hahulu, ne ba bonahala masila hahulu! Mi ne ba caula kuya ka mufuta wa ku minyauka inge mubinelo wa rock-ni-roll. Mi basali bani na ba sweli kuikwiseza mwa ku minyauka ona cwalo, mwa liapalo ze bonahala inge pepa, ye seta, ka buipi, ona mukwa wa-... Buseta ki busweu ni bunsu, ili mubala o puma. Buseta ha buweli kwa busweu kamba kwa bunsu. Ki mubala o puma. Ni pepa yene bonahala buseta, yene ba sweli kwa pata a bona, ni mungundo o belela inge likoci ze bonisa manoka mo a weyaukela kwa pata a bona, mi ne ba li fela mapunu ona cwalo kuzwa mwa teka kuya kwa halimu. Mi ne ba caula kuya kwa... kamba nako, kamba ku minyauka, ni ku zwelapili ni lipina zani, inge ba zamaya cwalo. Mi bali, "Yani kona keleke."

⁴² Mi hane itilo fita bukaufi ni na, pilu yaka ya bata ku welela. Na hupula kuli, "Haiba sani kona se si ka fiwa ku Kreste, kuba sina Munyaliwa? Mwahala kuikataza kaufela ni lika beile mutu mwateni, kwa kulika kutisa Munyaliwa ku Kreste; kono ku fumanehe wa litanya, ya masila, lihule leli bonahala masila cwalo kuti li be Munyaliwa wa Kreste?" Ne si ni kulisize kwa pilu.

⁴³ Mi ha na fitile, kasamulaho amano... Taha kone lu yemi, na sweli pampili mwa kwa pata a hae, inza minyauka, ni ku mbambala, ni ku zamaya inza kuta kafa ni kafa, hana nza ya cwalo, inge mibinelo ya kacenu ye ba nani mwa lizazi le, na itusisa kuba mwa mukwa wa butanya hana nza caula cwalo.

⁴⁴ Na hanina mulatu mwa lika zani. Ni kona fela kubulela se Ni bona. Mi Mulimu kakuba Muatuli wa ka, kono yani neli keleke yezwa mwa U.S.A.

⁴⁵ Cwale, hana sweli kufita cwalo, mukokoto kaufela no sina siapalo ni hanyinyani. Mi cwale hana sweli kufita cwalo, Na ikutwa kuwelela ni kukula.

⁴⁶ Mi ki Hali, "Munyaliwa uka iponahaza sina sapili hape." Mi ki ha kutaha Munyaliwa mwa mulaho wa hae, yena Munyaliwa ya na bonahala kuswana yani yana fitile kwa makalelo. Mi pilu ya ka ya tula ka tabo, ka kuziba kuli ku kaba ni Munyaliwa. Mi uka pangwa kwa lika ze swana, ni kutina mwa lika ze swana, ni Zona ze ne liteni kwa makalelo. Uka lukela ku bizwa.

Mi Ni ziba kuli yeo ki Niti. Haiba nji yeo ha ki niti, konakuli pono kaufela ye Ni kile na ba ni yona kwa mulaho i fosahalile. Mi mutu kaufela wa ziba, kuli, hakuna nihaiba nto iliñwi Ya kile a lu bulelela kwanda kuba Niti. Libile li ezahalanga, fela...

⁴⁷ Mi kana mwa bona, he, masila a keleke ya kacenu, u ipiza kuba "keleke"?

⁴⁸ Sina yomuñwi hana bulezi zazi leliñwi; Muzwale Ruddell, muzwale waka yomunde, uyemi ka ku yendamena kwa limota

kwani cwale. Kuli, na li boni inge situhela fa kota. Mi ne lu sweli ku ikambota mwa muzuzu ka zazi leliñwi. Mi Muzwale Ruddell na filikanyizwe ka buino bwa nako mi ni—mi ni maikuto a moya mwa likeleke kacenu, mo se likalezi ku kutela mwatasi. Bakutazi ba zwelela kai ni kai, mi ni lipuzo ni likalabo kwanu, ba buza, “Ki sikamañi se si ezahalile, Muzwale Branham? Ki sikamañi se si ezahalile?” Oh, mawi!

⁴⁹ Muzwale Ruddell na ni buzize puzo, “Kana se ba pila ka moya wa Satani, kamba cwani?”

⁵⁰ Se nili, “Batili, situhela si pila fa mata a mwa kota.” Sa pila kakuli, muselo wo ciwa, wa—wa lemune uka hula mwa kota ya olonji; kono hauna kubeya ma olonji, ni ha upila ka bupilo bwa yona.

Mi cwale keleke, ka mo i bizezwa, ki situhela fela se si comekilwe kwateni, kupila mwatasa libizo la bulapeli, mwatasa libizo la keleke. Katolika ni Baipanguli, ki lituhela fela, ze sweli kunwa fela... kwa mata a Kota; kono niteni libeya miselo ya zeo lili sona, kakuli ne li si ka cinciwu. Ne li siyo kwa makalelo, ona mulelo wa Mulimu wa sapili, kona libaka ha lina ni ku latula Linzwi ni kubeya mifuta isili ya miselo. Kota luli ya niti, mwa mubisi wa yona, ne i lukiselizwe kutisa ma olonji kwa kota ya olonji.

Jesu naize, “Kina Kota luli; mina mu mitai.”

⁵¹ Kono haiba kota yani ika beya mutai omuñwi, ika beya muselo wa yona wa makalelo. Mi ku lukela kuba ni ku kutisezwa kwa lika ze kaufela, kwa mafelelezo a Kota. Kuna ni kuba, kuna ni kutaha, ku kutisezwa, Liseli la manzibwana kuli li to Li tukisa ni ku Li eza kuba leli lukile. Kono li ka taha kuzwa mwa Kota, ha ki kopano ye comekilwe ku Yona; kono ki lika za makalelo za Linzwi. Lina ni kutaha ka nako ya manzibwana. “Mi ku kaba Liseli ka nako ya manzibwana.” Si lwala Liseli kuli I buzwe.

⁵² Mubone mo a petahalezi Mañolo! “Ki lizazi le li sike ku bizwa musihali kamba busihu.” Muselo haukoni kubuzwa kwanda kuli lizazi li ubuzwise. Hakuna taba kamba mu ka kutaza cwani, kaufela se mueza, haikoni ku buzwa, haikoni ku iponahaza, haikoni ku pakiwa; konji ka Yena fela ya Na ize kuli, “Kina Liseli la lifasi,” yena Linzwi. Kacwalo kuna ni kutaha e—e Mata, ili Moya o Kenile Kasibili, ku to buzwisa, kamba ku to bonahalisa, kamba ku to paka, kamba ku to paka kuli sa Na bulezi si ka ezahala mwa lizazi lona le. Liseli la manzibwana kona le li ezizwe seo. Ki nako ye cwani!

⁵³ Munyaliwa na fitile mwa siyemo se si swana mwa Na inzi ha Na li kwa simulaho. Kono Ne ni sweli ku Mu buha ha zwa mwa muhato, ni kulika ku Mu hoha kukutela mwateni. Cwale, zeñata za kona ku bulelwa ka lika ze, ka za lizazi le lu pila ku lona.

⁵⁴ Cwale, Hosea uize, mwa 6:1, “Mukutele ku Mulena” Muhupule, na bulezi kuli ba ka hasana, mi ba hasana. Ki hali,

“Ba ka kutela ku Mulena, kasamulaho wa ku hasana, mi Yena, uka ba kopanya hamoho.” Mulemuhe, “Mukute . . . Ku hasana; la bubeli . . . Neba ikabile, mi ba foufazwa.” Sani kona sene si ezahalile ona cwalo. “Uka lu folisa, mi uka lu kopanya.”

Inge Ezekiele 37, “Masapo a omelezi, musindi wa masapo a omelezi.” Ezekiele na boni, kukutela kwa ona hape.

Mi mulemuhe, Hosea naize, “Kasamulaho wa mazazi amabeli!” Kasamulaho wa mazazi amabeli Uka kuta ku bona. “Uka lu amuhela ni ku lufa, ku luancafaza.” Cwale, *ancafazo* haitalusi “zuhō.” Ku *ancafaza*, fani, ki linzwi le liswana le li itusiswa kai ni kai kaufela, Ne ni sweli ku li batisisa, litalusa, “ancafazo.” “Uka lu ancafaza kasamulaho wa mazazi amabeli.” Seo si kaba, “Mwa lizazi la bulalu Uka lu ancafaza hape, kasamulaho Amano lu hasanya, ni ku lu foufazwa, ni ku lu hasanya.”

⁵⁵ Mwa ziba, Majuda ne ba foufalizwe bakeñisa kuli lukone kubona. Ne ba abilwe fahali, ni ku hasana, neli naha, kono ba hana Mesia wa bona; kuli luna lu amuhele Mesia, kuli kube sicaba se si ka bizwa kuzwa mwahala Bamacaba ka Libizo la Hae.

⁵⁶ Cwale, kutaha muuna cwalo, mi musali unga libizo la hae. Ona Bamacaba ba libofu bani baba sa koni kubona Libizo lani, “lona la Mulena Jesu Kreste,” mwa kolobezo! Ki nto yemaswe hahulu fela, kono kuna ni kuba ona cwalo. Majuda, neba na ni ku—neba na ni ku sa bona sani. Kuna ni fela alimumu ya kona ku si bona; yo ki yena ya lukiselizwe ku li a si bone. Kusi cwalo, hamuna ku si bona.

Majuda ne ba si ka bona kuli yani neli yena Mesia. Mi, kanti, ne bakeni likolo mi nebali baituti, baana ba libubo lelituna la tuso ya sikolo, ne ba bala Bibele yeswana ye mu bala ni mina. Cwale, kasamulaho li ma no zibahazwa ku luna, lwa kona ku li bona hande patalaza, yani neli Mesia. Kono, neba palezwi ku li bona, mane nihaiba kacenu haba koni ku li bona. Ba polofitezwi kuba libofu, ni bona.

⁵⁷ Keleke, zazi le, i polofitezwi kuba sibofu, kuli i hane Liñusa la nako ya manzibwana. Sinulo 3 ibulezi cwalo, “Wena u shebilie, u mwelwa,” mulemuhe muinelo wa munyaliwa busihu bobuñwi, kamba keleke, “mapunu, sibofu, mi ha u zibi.” Mulena Jesu, u lu utwelle butuku! Bibele ibulezi kuli nali “mapunu.” Neli si ka libona konji ka nako ya cwale. Keleke ya Laodesia neili mapunu. Mi hane i bonahalile busihu bobuñwi, nali “mapunu,” ne isika li lemuha, “mi neisa zibi.”

⁵⁸ Oh, haki buitumelo ni boo! Mo kuinezi, ki kabakaleo lu itumela hahulu! Ni ikutwa kuli ha lu itumeli hahulu kwa lika zeo Mulimu asweli ku lu zibisa.

⁵⁹ “Mapunu.” Mi lipono zali, ne li ni bonisize kuli nali mapunu kono na sa zibi, ni “bubofu.” Sina Isilaele hanali sibofu ili kuli

Bamacaba bakene mwateni, cwale Bamacaba ba foufalizwe ili kuli Munyaliwa akone ku ngiwa mi Isilaele akone ku amuhela mukiti wa Litolombita. Ona cwalo ka kupetahala fela!

⁶⁰ “Kasamulaho wa mazazi amabeli Uka lu ancafaza, kamba lu lufa ancafazo, ku lutisa hamoho, bao ki Majuda,” ka kubulela fa Litolombita ze cwale. Mi Uka lu . . . “Mi luka pila fapila Hae, kamba kuba ni Bupilo Bobusafeli. Mwabona, lu kaba fapila Hae.” Bibebe ibulezi mwa Hosea, kuli, “Mi lu ka pila fapila Hae; Bupilo, lube ni Bupilo fapila Hae.” Bwani kona Bupilo bwa Hae Luli, Bupilo Bobusafeli, “kuba ni Bupilo fapila Hae.”

“Musali ya pila mwa minyaka u shwile kale ni ha pila cwalo.” Kacwalo luna . . . na sepisize hape kuli Isilaele ukaba ni Bupilo fapila Hae. U sa shwile, kuya ka niti, ni kwa mukiti wa pentekota.

⁶¹ Cwale amulemuhe, ka tokomelo. “Cwale kasamulaho wa mazazi amabeli.” Cwale, sani ne si sa talusi kuli mazazi amabeli a lihola ze twenti fo, kakuli kubile ni . . . Zani ne li ezahalile kwa mulaho kafoo, myaha yemiñata ye mianda anda kafoo kwa mulaho. Mwabona? Ne kutalusa, “mazazi amabeli ni Mulena,” kasamulaho wa myaha ye likiti zepeli. Cwale, mwa ziba kuli seli nako yetelele cwani kuzwa nako yani? Se kubile myaha ye mianda ye mashumi amabeli ka ye supile kuzwa nako yani, kakuli mwa Hosea mo ki B.C. 780. 1964, mwabona, seli nto yeñwi kona kueza myaha ye mianda ye mashumi amabeli ka ye supile kwa mulaho. Ki hali, “Kasamulaho wa mazazi amabeli, mwa lizazi la bulalu, Uka lu ancafaza hape, ni ku lufa Bupilo fapila Hae.” Ki zani Litolombita za mina ze taha. Yani kona hola ye lupila ku yona, lona lizazi le lupila ku lona.

⁶² Cwale, ba se ba hasani, ba foufalizwe, ba kopani, mi baile bakeni mwa lizazi la bulalu. Mwabona cwale? Ne ba hasani, kuzwa kwa Palestine, mwahala lifasi kaufela. Ne ba foufalizwe, ka kuhana Mesia. Mi cwale ba se ba kopani mwa na ha ya habo, ku itukiseza za Litolombita, kuli ba lemuhe Swalelo.

Sina Bibebe ha ibulela kuli, “Ha ba I amuhela, ni ku Mu fumana ni mañiba a limapo,” kasamulaho Keleke imano shimbiwa, “mi ba li, ‘Ki kai ko U ngile mañiba a?’ Mi ali, ‘Mwa ndu ya balikani ba Ka.’” Mi ki Hali, “Ne ba ka kauhana, lubasi lufi kaufela, ni kulila ku bokoloha, ka mazazi, kuswana sina lubasi lo lu latehezwi ki mwana bona wa mushimani anosi.” Muhupule, ona mukiti wa Litolombita wani no na ni kueza cwalo. “Ku lila, kusilisa bakeñisa Sitabelo se si bulailwe,” mi ne ba Si hanile.

⁶³ Ba inzi mwa na ha ya habo. Ne ba hasani, ku foufazwa, mi cwale ba kopani. Mi kaufela zeo nelili mwatasa Liswayo la Busilezi lani, Litolombita Zesupa za bona . . . na li lizizwe ili kuba kopanya hamoho, Tolombita ya Busilezi. Ya Busupa ki “yona Tolombita Yetuna yani,” sina hane luna ni zona Sunda

yefelile. Tolombita ya Busilezi ne i lizizwe mwatasa Liswayo la Busilezi. Kuswana fela ni kukwaluha kwa Liswayo la luna la Busilezi, lika kaufela ka nako yeswana; fela, za bona ne li lizizwe hañwi; kafoo, luna lubile myaha ye likiti zepeli mwa mukiti wa pentekota.

⁶⁴ Cwale, myaha ye mianda ye mashumi amabeli ka ye supile kuzwa ka nako yani. Ki hali, “Mwa lizazi la bulalu, luka kopana hamoho. Kasamulaho wa mazazi a amabeli, mwa lizazi la bulalu, luka kopana hape, ni ku amuhela Bupilo fa pila Hae.” Kana mwa i bona sepiso? Hola ka kupetahala ne i ñozwi fa limota. Lwa bona fo lu pila.

⁶⁵ Cwale mwa mubu wa habo bona, ba libelezi Mukiti wa Litolombita, kamba temuho ya Swalelo, ni ku libelela Kutaha, kulila bakeñisa kuhana kwa bona kwa nako ya bona ya pili ye ne ba Li hanile. Ba inzi mwa naha ya habo ka seo, ba libelezi. Ki sikamañi se bali kaufela . . . Liki kaufela litomile mwa libaka za zona.

⁶⁶ Kakuba mukutazi wa Evangel, Hani boni nihaiba nto iliñwi ye siyezi kwanda kuya kwa Munyaliwa. Mi Munyaliwa una ni kungelwa ba si ka lemuha kale ze ezahalile. Ne ba tamilwe, ku hasana . . . Ni taluse, ne ba hasani, ku foufala, mi cwale ba kopano. Ki sikamañi se si siyezi? Ki Munyaliwa ya lukela ku zuswa mwa nzila. Ku libelelwya kuya kwa Munyaliwa, kacwalo bapolofita ba bona ba Sinulo 11 bakona kuba bizeza kwa mukiti wa Tolombita, kuli ba lemuhe se ba ezize.

⁶⁷ Muhupule, ona mwahala Maswayo ani, kwa taha Liswayo la Busilezi. Mi ne kuna ni ba baeza mwanda ni likiti ze mashumi amane ka zene, baketwa ni baba bizizwe. Mi mwahala Tolombita ya Busilezi ni ya Busupa, Sinulo 11 i bonahala hande mwateni cwalo ka ku zamaeleta ni Liswayo la Busilezi.

⁶⁸ Ki sikamañi sa kueza? Sina ni kueza sikamañi? Mi se ne si lukela kutisa lipaki zepeli, Mushe ni Elia, bapolofita. Kanti, Majuda bona ba lumela fela bapolofita ba bona. Mi baka taha ni sisupo sa bapolofita, mi musebezi wa bona ukaba wani wa bapolofita, kakuli ne baeza ona luli.

Ku bonisa nto iliñwi, kuli, mutu, ha ushwa kamba sika kaufela, ha u siya lifasi le, sibupeho sa hao ha si cinci. Haiba u lihata cwale, ukaba lihata kwani. Haiba u wa likañi hahulu ni kutiya toho faa, ukaba wa toho tata kafani. Haiba u wa honona faa, u ka yoba wa ku honona kwani. Baana ni basali, seli nako ya ku itebuha ili mina ni ku itekula mina bañi, ni kubona fo lu yemi, kakuli lifu ha li cinci lika.

⁶⁹ Ne se baile ka myaha ye likiti zepeli. Mushe neli bukaufi ni myaha ye mashumi amabeli ni ye ketalizoho, ni Elia kuzwa ka nako yani . . . Bukaufi ni myaha ye mianda ye mashumi amabeli ka ye ketalizoho kuzwa fa yezi Elia, mi Mushe na sa ile, mi fa ba kuta ka sibupeho se si swana ni kueza lika ze swana.

Lifu ha liezi sika ku mutu kwanda ku cinca fela sibaka ko apila. Ha li cinci sibupeho sa hao. Ha li cinci tumelo ya hao. Hakuna se li cinca ku wena kwanda sibaka ko upila.

⁷⁰ Kacwalo, kuya ka mo si inezi sibupeho sa hao kakusasana cwana! Haiba wa kakanya Linzwi la Mulimu, uka yoba ya honona ni ka fani. Hanina taba kamba u ya kenile cwani, ka mo pilela, ni mo pilela ka bunde, hasina ku cinca nihaiba nto iliñwi ku wena ha u ka shwa, ki sibaka fela ko upila. Mi haiba haukonni ku amuhela Linzwi la Mulimu ka kutala ka mo Li ñolezwi, hauna ku yo eza cwalo Ka fani; kacwalo, musike mwa bilaela, hamuna ku yoba teni Kwani.

Muna ni ku Li amuhela mwa mutalelela wa Lona, mwa mata a ponahalo ya Lona ya seo Lili sona, kona mukaba siemba sa Lona. Fela ki Linzwi la Hae la Ka zusa, sina mwa Na ezelize Linzwi la Hae ka kakusasana wa Zuhu. Ki Linzwi la Hae fela kona lene litile, mi haili bene ba shwezi mwa Linzwi la Hae, ne ba lumela Linzwi la Hae mi ne ba bonisize Linzwi la Hae.

⁷¹ Mulemuhe, cwale, seli myaha ye mianda ye mashumi amabeli ka yesupa yefelile kwa mulaho. Mulemuhe, ne ba hasani, ne ba foufalizwe, mi cwale ba kopanyizwe. Cwale, nto yetatama ki kuli ba lukela ku amuhela Bupilo.

⁷² Mi Bamacaba ba bizizwe. Munyaliwa u itukisize. Kuungelwa ku sutelezi fakaufi. Kana lwa lemuha cwalo? Kana lwa kona kulumela cwalo shangwe? Kana ki likande le li bulezwi nji? Kikuli ki litangu, ku luna nji? Kana ki nto yeñwi ye utwahala kuba ya niti nji? Kana ki nto yeñwi ya kuli luna, ba kwande, lwa kona ku lumela? Kamba, kana ki nto ye li mwahali ku luna, yeli kalulo ya luna, ili nto yefita bupilo ku luna? Ki buino mañi bo lu bonisa, kakusasana cwana, mwa tabernakele mo? Muhupule, ikaba mutapi o likani kona o ka Li amuhela.

⁷³ Cwale mwa naha yani, ba libelezi Litolombita. Cwale lu libelezi kuya kwa Munyaliwa yo munyinyani, ili kuli Sinulo 11 italelezwe. Linako za likeleke lifelile; Maswayo a kwaluhile, sani si bonisa sene ba siile mwa lusika lwa keleke, mi ni Liñusa se lifilwe. Isilaele ya iponahaza, haleluya, i itukiselize Mukiti wa Litolombita.

⁷⁴ Oh, mina sicaba kwa manaha asili ko muutwela tepu ye, kikuli hamukoni kuzuha nji, wena muzwale? Kamba, kikuli La kubisa sibofu nji? Kana uka Li nepela kwande ni ku Li biza kuli ki bu polofita bwa buhata? Kanti, Li pakilwe hande ka swanelo fapila hao, ka lifasi, ka nako, ka batu, ni ka Moya o Kenile Yena ya na Li ñozi. Li pakilwe, hamoho cwalo ka nama, ka moyo, ka libyana. Lika kaufela za Na bulezi li talelelizwe mi li i ponahalize.

⁷⁵ Isilaele mwa naha ya habo; na ba isize mwani, kuba lisa mane bakena mwateni, inge lingu. Litongwani za mu matisa mane ni ku baisa kwa sibaka sa maipato, kuya kwa naha ya bona bañi.

Muhupule, Isilaele i sepi sizwe fela ku fuyolwa haibile ika ina mwa naha ya habo. Mulimu ha fuyolangi Isilaele habali kwande a naha ya bona. Abrahama naile kwande a naha, na filwe mulatu. Kaufela ya siya naha ya habo una ni kufiwa mulatu. Mulimu u fuyolanga fela Isilaele haiba upila mwa naha ya habo, mi uteni mwani cwale seli naha. Mi Keleke i bizizwe; i libelezi fela Kuungelwa, kwa Munyaliwa kuli a shimbwi.

⁷⁶ Maswayo a kwaluhile. Ku patuluzwi ku luna. Lwa bona sene ba siile. Mina baba bata ku hohana ni ku kanana ka peu ya noha, ni kolobezo ya mezi, ni zeñwi cwalo, mu libofu mi ha mu li zibi. Mulimu wa lifasi le u mi foufalyze, ku Zona, mi ha mu zibi cwalo. Hani zibi hane Ni bile ni nako ye cwalo kakusasana kacenu, ku lwanisa ona matata ani!

⁷⁷ Kuli bapolofita ba bona bakone ku patululwa mwa lizazi le; haba koni kueza cwalo, kuya ka Litolombita, ka...kuya ka Mukiti wa Litolombita.

⁷⁸ Na ize, ka Hosea, "Ni kumuzi." Cwale mutualimele, U bulela ku Isilaele. "Ni kumuzi," kamba ka manzwi amañwi, "Ni lemile, ni ba lemile, kuya ka bapolofita." Cwalo kona Mulimu mwa ezezanga sicaba sa Hae. Na ba lemile kuzwa mwahala linaha zeñwi. Ka sikamañi? Ka Mukwale wa Hae olozizwe kafa ni kafa, Linzwi la Hae. Na ba lemile, naha ya Ha, kuzwa mwahala linaha. Na lemile naha ya Hae kuzwa mwahala linaha, ka bapolofita, ili Linzwi la Hae le li pakilwe.

Kona Mwa lemezi ni Munyaliwa wa Hae kuzwa mwahala likopano, ka Linzwi la Hae; leli sepi sizwe ki Malaki 4, mwa lizazi la mafelelezo. U lemile Munyaliwa wa Hae, ku Mu kumula kuzwa mwa likeleke zeñwi kaufela! Ukumuzi Munyaliwa wa Hae!

⁷⁹ U lemile kwateni, bapolofita ba Hae; kuya, ka bapolofita ba Hae, ka Linzwi u lemile Isilaele. "U kauhane ku bona kaufela."

Mutalime hane babata kueza inge baba siyezi ba bona. Ba taha ku mupolofita, Samuele. Mi ali, "Kana Ni kile na mingela masheleñi a mina? Kana Ni kile na mi bulelala sika, ka Libizo la Mulena, mi ha si si ka ezahala?"

Mi bali, "Batili, zeo, zeo li lukile, kono lu sa bata mulena."

⁸⁰ Kona mo li ezelize likeleke cwalo. "Oh, lu lumela Linzwi. Ku lukile, kono, mwa ziba, ba bulela kuli lu no ezanga *cwana*." Hanina taba ka se ba bulela. Linzwi li lukile!

Ku libelela. U ba lemile kwateni, kuya ka bapolofita.

⁸¹ Ki nako mañi, muzwale? Ki nako mañi, mukutazi? Kana wa bona nako ya lizazi le nji, ni sisupo so pila ku sona? Kana mwa utwisisa? Kikuli mwa si bona?

⁸² Kai ni kai, hakuna ancafazo. Mañi ni mañi wa bilaela, bakutazi ba lila. Ne ni sweli kubala yeñwi ya mitende ye—ye butokwa hahulu ye tahanga kwa keleke kwanu, ki mutende o munde hahulu. Mi Na ziba muñoli wa ona, mi Na ziba ni sicaba.

Mi ki batu ba bumulimu, ba bande luli, Muzwale ni Kezeli Moore, wa *Kupatalaza Kutaha kwa Hae*. Yeñwi ya mitende yende hahulu mwa simu, *Kupatalaza Kutaha kwa Hae*. Kono ha bakoni kupulinta sika sifi kaufela konji kuli sibe ka za, “Kuitima lico, kulapela! Kuitima lico, kulapela! Kuliza tolombita! Munge...” Ki babakai baba ubalanga? Mwa ziba. Muka libona nako kaufela, “Kuitima lico, kulapela! Kuitima lico, kulapela!” Kona ze muka utwa feka. “Kuitima lico, kulapela! Lukaba ni kupazula kwa lizazi ko kunde! Kuna ni nto yetuna ye ka ezahala! Kaufela mina, mulapele, mulapele! Halu sika liyeha kale!”

⁸³ Ki kabakalañi haba eza cwalo? Ki kabakalañi haba eza cwalo? Ba bata zuho yetuna. Basweli ba huwa, ba lumela kuli ku kaba ni zuho. Ki batu babande. Kiñi hakuli cwalo? Ki sikamañi se ba ezize? Ha ba si ka lemuha zuho ya Munyaliwa. Mwabona? Ka kuba Mukreste, ba utwa muhohelo wa hola ye, kono ha ba si ka lemuha se si ezahalile. Kona se si ba eza kuikutwa cwalo. Ba ziba kuli kuna ni se si lukela ku ezahala, kono, mwabona, ba sweli ku libeleta nto ye sali kwa pata, ye sa taha, kanti i ezahalile kale bukaufi ni mina.

⁸⁴ Yani ki nto yeswana ni ze ne ba ezize mwa mazazi a kale. Ne ba lumela ku Mesia yana sa taha. Ne ba lumela kuli ne ku ka taha mutwaleti. Kono nali mwahala bona, mi ne ba si ka ziba. Ne ba si ka lemuha. Ne ba lumela kuli ne ku taha mutwaleti ya na ka eteleta Mesia, kono ba mu puma toho. Ni ku bulaya Mesia wa bona, kakuli ne ku polofitilwe kuli ne ba kaba libofu. Hosea na bulezi cwalo.

⁸⁵ Mi Moya o swana, ono bulezi ka Hosea, bo bulezi ka Joani mi wali keleke mwa mazazi a maungulo a ikaba “mapunu, mi ya sibofu, mi ika Mu kasheza kwande a keleke.” Ne ba palezwi kubona sipolofita sani ha si talelezwa. Kono, kuba mwahali mwani, ba lemuha kuli kuna ni se si lukela ku ezahala. Fela ha ba lemuhi sesiñwi. Ha ba lemuhi sesiñwi. Kuswana sina Majuda ba linako za kale; Laodesia ya foufalizwe; bufumu, lituto za bulapeli, mahañi ni Keleke, mahañi kwa Liñusa. Mutualime mone ba bezi ni mahañi Majuda bani ni Joani. Mutualime mone ba bezi ba mahañi ni Jesu, kanti mane inge ili Yena luli Yo ne ba ipapata ku libeleta.

[Lilimba liutwahalisa mulumo o mutuna—Mu.] Ni sepa kuli kele lu pancisa fyuzi. Ni sepa mwendi seo si ka tima matepu asweli ku rekoda, ni ona. Ha sitimi. Ku lukile.

⁸⁶ Neba bana ni mahañi kwa Liñusa.

Ki sikamañi se si ezahala, kuna ni tundamo yetuna hahulu; mañi ni mañi wa mina mu sibyana se si cisa. Hakuna mukwa wa kubeya keleke hande ku zani, mwataswa linako zani. Kuli, mwa bona, mañi ni mañi wa mina una ni ma BTU a nainte eiti, ka swanelo. Mi ha muini fela foo ona cwalo; musweli kuzusa mufutumala ku swalelala ona cwalo. Kuna ni moyo o

muñata hahulu mwahali mo cwale o kona ku kangelisa sibaka. Kono, hamoho cwalo ni kucisa ko ku liteni, hamu—hamu koni kueza cwalo.

⁸⁷ Mulemuhe, mahañi! Kono, cwale, sina Majuda bakale, bubofu! Ba cwalo ba Laodesia. Ba inzi “mapunu, ba nyandile, ba botanile, mi ha ba zibi.” Lizazi la bufumu, lituto zetuna za litaba za tumelo, tuto yetuna, mi cwale se ba bile ni mahañi kwa Liñusa. Hakuna se ba bata kueza ni Lona, inge fela mo ne kuinezi mwa mazazi fani Jesu wa Nazareta hanali mwa lifasi.

⁸⁸ Libaka leo sicaba, mwa lizazi la Nuwe, hane ba si ka kena mwa areka, kakuli neba si ka lemuha liñusa kamba numwana wa lona. Leo kona libaka fela hane ba yundile, kakuli ne ba si ka lemuha hola yene ba pila ku yona. Ne ba si ka lemuha kuli Mulimu na ka talimana ni sibi ka Mwa Na latela. “Na ka sinya mutu, kuzwa mwa lifasi.” Na sepisize cwalo. Na talusa ona cwalo. Mi U talusa ona cwalo kacenu sina mwa Na taluseza ka nako yani.

⁸⁹ Kono haili sicaba, kufita kuli sibe ni kutwano ni Nuwe, na talimwa inge mutu ya takani. Ne ba sa mu lumeli kuba mupolofita. Mwa ziba, Jesu, Yena luli Kasibili, na lu bulelezi mo ne ba keshebiseza mwa mazazi a Nuwe, ku mu bona bukuba, ku mu biza kuli ufiteleza hahulu tumelo ni zeñwi cwalo. Kono ne ba si ka lemuha hola ya bona. Ne ba si ka lemuha lizazi la bona. Ne ba si ka lemuha sisupo sa bona. Ne ba si ka lemuha liñusa la bona. Ne ba si ka lemuha numwana wa bona, kono ba mu leleka kuzwa mwahala bona ni ku mu seja. Jesu ali, “Sina mo ne kubezi mwa mazazi a Nuwe!”

⁹⁰ Ni Isilaele mwa na ha ya hae, ni lika kaufela ha li kwanile cwale, mi ni Liñusa lisweli fela ku zamaya hande mwateri, ki lizazi mañi le lupila ku lona, muzwale? Ki kai fo lu inzi?

⁹¹ Ne ba si ka ziba lizazi. Ne ba si ka li ziba. Kona hane ba li latehile, kakuli ne ba si ka li lemuha. Ne ba swana sina lizazi, mane inge batu babañata ba kacenu, baba foufalizwe ka likezahalo za sayansi, ka milao ya lituto, ka mikopano ya lituto za bulapeli. Ni lika ze ne ba foufalizwe mwa lizazi lani, li ezize nto yeswana ni kacenu. Li ba foufalize, hape.

⁹² Mi, hape, ka bunolo, bunolo bwa liñusa ni mulumiwa! Nuwe ne si wa sayansi. Ne si muuna ya itutile. Neli mulimi wa mubotana, ya ishuwile, ni liñusa le li bunolo. Neli le nyinyani hahulu ka kuituta kwa bona ko ku pahami.

Kucwalo ni kacenu! Mulimu kamita u liezanga ka bunolo, kunga sicaba baba ka lumela ni ku Mu sepa. Ki shutano, ki Liñusa fela le li shutana, kono Mulimu ya swana. Cwale Ni bata kuli mu Li lumele ni ku utwisisa kuli Mulimu u Li bulezi.

⁹³ Jesu naize kuli ne ba somile mupolofita wa Hae, Nuwe. Mi hane ba soma ka lisheha mwa lizazi lani, ki mo ba ka ezeza ka Kutaha kwa Hae. Ne ba ka eza nto yeswana.

Leo kona libaka leo Faro hana tibile mwa liwate. Na si ka lemuha kale lizazi la hae. Na si ka lemuha kale sene si sweli ku ezahala. Na ngilwe hahulu mwa lusika lwa hae lone lu fumani za sayansi, kuyaha mileneñi ka tuso ya batanga. Na li ya—nali ya patehile hahulu, kuli alemuhe kolo yana nani, mi afetula numwana wa mupolofita wa Mulimu kuya mwa lihalaupa. Na si ka li lemuha. Leo kona libaka lika hane libile mone li bezi. Na si ka li lemuha. Kambe na ka lemuha fela Linzwi la Mulimu, kwa sicaba sani!

⁹⁴ Mi haiba likeleke kacenu ne li ka lemuha fela, kambe likeleke ne lika lemuha fela Linzwi la Mulimu leli file sepiyo ya hola ye, kwa sicaba, ne ba sike ba yunda.

Haiba America ne ika lemuha fela milao ye ne iñozí, ne isike ya itakaleza kunga Libibele kuzwa mwa likolo, kunga Libizo la Mulimu ku li zusa fa masheleñi a muwayawaya, ni kuitama ka likute ku Mulimu. Kono ha i lemuhi cwalo. Kiñi? Seili sibofu, mapunu. Haikoni kulemuha mali a bashimani babande bani bene ba shwezi mwa masimu ka litohonolo le. Ba libezwi; ki liluli.

⁹⁵ Kono kuna ni Alimuñwi Ya hupula kuli na suluzi mali a bapolofita, teko yene bile teni fa kutisa Evangelí ye ku luna kacenu. Kamo ne ba cezwi ki litau ba baeza ma sauzande, ni ku nepelwa mwa misima, ba sahiwa fahali, baciswa, ba kokotelwa! Mulimu wa lemuha cwalo.

Keleke i libezi bapolofita ba yona. Ha “ba sa ba tokwa ni hanyinyani,” ba bulela cwalo. Kono Mulimu wa ziba kuli Una ni kuba ni bona; U kumula sicaba sa Hae ka Linzwi la Hae. Kono Seli za kale hahulu ku bona mwa lizazi le. Ha ba Li lemuhi. Kona libaka habali ka mo ba inezi. Ki kabakaleo habali “mapunu, banyandi, libofu, babotana, mi ha ba zibi,” kakuli ha ba lemuhi hola ye lupila ku yona. Haba i lemuhi.

⁹⁶ Mushe, na lemuhile lizazi la hae ni pizo ya hae, hana boni sepiyo ya Linzwi la Mulimu ya lizazi lani ha i talelezwa. A ziba ona fani, ni kulemuha sa nali sona ni sa na lukela kueza, ka Linzwi lene li sepisizwe. Kacwalo na si ka saba sa na bulezi mutu ufi kaufela. Na sa swabeli liñusa la hae, nihaike inge kuli muprisita kaufela ni faro ufi kaufela, lika kaufela, puso kaufela, ne isa lumelelani ni yena. Kono na lemuhile ha bona Liseli lani, ona Siita sa Mulilo sani sene si lepelela mwa sicacani sani, mi a bulela ni yena Linzwi lene li sepisizwe mwa lizazi lani, mi ali, “Ni ku bizelize kueza nto yeo.” Na si ka saba bu—bu buhali bwa mulena. A yo shetumuka ka kutisa sicaba sani kwa mututo, sina Linzwi la Mulimu mo li sepiselize.

⁹⁷ Ka kubona sepiyo ye bonahalile, a lukisa sicaba kukena mwa mututo. Lili? Hana boni sepiyo ya Mulimu ha i talelezwa. Muhupule, a mata ni tuto ya hae ya za litumelo; a mata ni tuto ya hae. Kono cwale ha na boni Linzwi la Mulimu ha li iponahaza,

a Li bona ha li iponahaza, “KINA YALI NA,” kona kuli na si ka saba sa na bulela mutu ufi kaufela. Na si ka saba sa na ka mueza Faro. Na si ka saba sene ba ka mueza babañwi bani kaufela. Na saba fela Mulimu, kuli akone ku utwisia Mulimu, kamba mukwa omuñwi wa na ka tokwa ku utwisia Mulimu ka ona. Na si ka saba sicaba sene ba ka bulela kamba sene ba ka eza. Fela na saba Mulimu kipeto, kasamulaho amano lemuha kuli neli Linzwi la Mulimu.

⁹⁸ Na sa utwisisi kuli muuna ya swana sina yena na ka lumiwa cwani kwani. Kono cwale hana ti lo lemuha, ka Linzwi le li pakilwe, seo nesili sona, mi a tokwa ku saba litaelo za mulena. Kambe nemuka lemuha fela, kambe kacenu neluka lemuha fela! Mushe na li lemuhile hana boni Linzwi ha li talelezwa, abona ponahalo yene i pakilwe, Na itukisize mututo wa sicaba.

Jobo na si ka lemuha kuli yani neli Mulimu. Haibile fela diabulosi wakona—wakona ku kueza kuli ulumele kuli miliko nyana yo sweli kufita ku yona fokuñwi ki—ki Mulimu ya ku... bakisa ka koto! Neli Mulimu yana lika ku mu bonisa sika sesiñwi. Jobo na si ka li lemuha kufitela habona pono. Sina Mushe; mi Mushe hana boni pono, Siita sa Mulilo mwa sicacani, ne si pakilwe. Mi mane...

Jobo, mwa puzo ya hae ya kuli, “Haiba mutu a shwa, kikuli uka pila hape? Ni bona kota ha ishwa, mi ya pila hape. Ni bona palisa ha ishwa, mi ya pila hape.” Yeo neli yona puzo ya hae. “Kono mutu ha lobala, u pumehelwa ki moyo wa hae, wa ikela. Bana ba hae ba bashimani ba taha ku to silisa, mi a tokwa ku lemuha. Oh, kambe Wena no ka ni pata mwa libita kufitela buhali bwa Hao bu fita!” Na sa utwisisi libaka palisa hane ishwa ni kupila hape, kamba litali mo likona kuzwela kwa kota, mwa mubu, ni kuina mwa mubu, mi ni kukuta hape ka nako ya litabula. Ki hali, “Mutu ha lobala, mi kana uya kai? Ni sepa ki ku Mulimu; kono ki sikamañi se si ezahala ku mutu?”

⁹⁹ Kono he cwale zazi leliñwi lumonyi lu kala ku benya, mishika ikala ku utwahala, Moya wa taha ku mupolofita. Mi a bona kutaha kwa Muuna Yana kona kubeya lizoho la Hae ku mutu wa sibi, mi ali Mulimu ya kenile, mi a to kopanya nzila. Mi ki ha huwa, “Na ziba Muliululi wa ka wa pilal! Niha likokwani za litalo lika sinya mubili woo, ibo kona mwa mubili waka wo mo Ni ka bona Mulimu!” Na lemuhile seo zuho neili yona.

¹⁰⁰ Balami na si ka lemuha Lingeloi kufitela mule haibulela ka malimi. Balami na palezwi kulemuha kuli Lingeloi ne li yemi mwa nzila. Mukutazi wa sibofu na si ka lemuha kuli neli Mulimu yana yemi mwa nzila, inza lika ku mutibela kuli asike a lekisa mpo ya hae ka masheleñi. Mi cwale mule haito bulela ka linzwi la mutu, ki ha Balami a lemuha kuli neli Lingeloi lene li yemi mwa nzila ya hae, lene li lika ku muhanisa za na sweli kueza.

¹⁰¹ Oh, mina likopano za libofu! Haiba nji Mulimu akona ku itusisa mule, nto ya simumu, kuli i bulele mushobo wo i sa zibi, ili kupatulula ku mukutazi kuli u zwile mwa nzila, kikuli Hakoni ku itusisa mutu kuli aeze ze swana? Batu ba libofu!

¹⁰² Kambe fela Akabe na lemuhile lizazi la hae, na si ke a nyaza mupolofita, Mikaya, ni Linzwi la Mulimu lene li sepi sizwe ku yena.

¹⁰³ Fani Akabe hana yemi fani zazi lani, yena ni—ni Jehoshafati. Mi hane banani bapolofita baba mianda yemine kwande kwani inge ba polofita, bali, “Zamaya ukambame! Lika kaufela liiketile. Akabe, u pila mwa sibi. U lu ezize kuba kopano yetuna! Lu sicaba sesituna. Lu bulumiwa bo butuna. Ki luna ba, lu baprisita baba mianda yemine baba lutilwe hande, kamba bapolofita. Lu baba mianda yemine, baba lutilwe mwa Linzwi ni lituto za bulapeli. Lwa ziba kaufela ka Zeo.”

¹⁰⁴ Cwale, he, ne ku bonahile kuli ne ba si ka ziba sesiñwi ka Sona. Muuna yene ba biza kuli ki sikuba, mwa lusika lwapili ku bona, Elia, yena mupolofita wa niti wa Mulimu, na polofitile ali, “KISONA SA BULELA MULENA, ‘Linja lika kapa mali a hao, Akabe!’” Mwabona?

¹⁰⁵ Kono baprisita bani, bapolofita ba ipangezi mutu, ne ba hupula kuli neba lukisize lika kaufela Zona. Se bali, “Ndate Abrahama . . . kamba, Ndate Akabe, zamaya ukambame! Mulena una ni wena. Una ni Mañolo, kakuli Mulimu na file naha ye ku Isilaele. Ki ya Isilaele. Zamaya ukambame! Mulena una ni wena.” Oh, mawi!

¹⁰⁶ Kono, mwa ziba, Jehoshafati, alimuñwi yana si ka izwaka mwa sibi sina Akabe mwa na bezi, a bona ka ku shutana nyana. Ki hali, “Kana hakuna nihaiba alimuñwi fela?”

¹⁰⁷ Ki hali, “Luna ni alimuñwi kwanu, kono Ni mu toile.” Mwabona? Ki sikamañi sana eza Mulimu? Neli kulemaka sicaba sa Hae kwateni, ka mupolofita, hape. “Ni mu toile. Yena hakuna sa ezanga kwanda musebezi wa ku ni nyazanga fela nako kaufela. Mi u ziba kuli na Ni mutu yomutuna. Ne ni sike bana ni mukopano wo kwanu kambe Ne ni si mulumeli yomutuna. Nina ni baana baba lutilwe hande. Ni ba inisangafafasi ni libuka ni Libibe, ni lika zeñwi, fa kuluta ze. Mi Ni ziba kuli ki baana babatuna.”

Kono kambe Akabe na ka lemuha fela kuli mutangana yani neli ya cwani, yena mutangana yomunyinyani yana bonahala ku pazauha yani, mwana mushimani wa Imila, yana yemi fani, amu bulelela kuli, “KISONA SA BULELA MULENA,” na si ke aeza mafosisa a maswe ani ana ezize. Kono a nyaza Mikaya. Na si ka lemuha . . .

Oh, sicaba, amulemuhe lusika lo mupila ku lona! Mutualime se si ezahalile. Mutualime sene si sepi sizwe. Mulemuhe lizazi le mupila ku lona.

¹⁰⁸ Kambe fela kopano ya keleke kacenu neika lemuha libaka haba sweli ku nyaziwa, ni ma membala ba bona basweli ku ba mata, sina Isilaele mwa na zwezi mwa Egepit! Haiba likopano ne lika tuhela fela ku nyaza matepu ani, mi ba ateeleze! Mi wena, mukutazi, ya teeleteza kwa tepu ye, uteeleze! Kambe fela no ka lemuha hola yo sweli kupila ku yona, kambe no ka lemuha fela sisupo sa nako, no ka bona libaka leo batu basweli ku matela kuzwa mwa likopano zani. Moya wa Mulena, wa biza! “Hakuna mutu ya kona kutaha ku Na,” Jesu abulela, “kwanda kuli Ndate A mubize. Mi bao kaufela Ndate anani, mwa linako za kale, bona ba Ni file, ba ka taha.”

¹⁰⁹ Sina musali yomunyinyani fa lisima, ni muprisita, mone ba shutanela! Muñolo u fa limota kacenu, hape. Ba u bona, kono ha ba u lemuhi.

¹¹⁰ Kambe fela Majuda ne ba ka lemuha sisupo sa mafelelezo sa Mesia wa bona, kuya ka mupolofita wa bona wa mafelelezo! Malaki 3 iize, “Amubone, Ni luma numwana wa Ka fapila Ka, mi uka lukisa nzila.” Mi ne ba ipapata kuli neba sweli ku Mu libeleta.

¹¹¹ Haki—haki taba ye zamaelela kufitela ka—ka kacenu! Basweli ku ipapata kuli ba libelezi nto yeñwi ku ezahala. Likeleke kaufela za lapela ni kuitima lico, ni kubulela kuli, “Cwale halu lapeleni. Haluben hamoho. Luna ni kuba ni nto yetuna ye ka ezahala. Lu ziba kuli kuna ni sesiñwi sesituna se si ka ezahala. Keleke ina ni ku itukisa.” Kona ze basweli ku lapelela fateni.

¹¹² Kona zene basweli ku lapelela kwani. Mi se kutaha Joani Mukolobezi. Kakuli, na hanile mikopano ya bona, kakuli na ezize ka ku shutana ku se ne ba lutile bashemi ba bona. Na zwile mwa lihalaupa asina tuto. Na tile kola ya hae isika putiwa kale, sina mone ku ka bulelewka kacenu. Ataha kusina sishañata tuna sa lituto za litumelo. Kono a taha, inza ziba ka sepiso ya Mulimu kuli na lukela ku zibahaza Mesia.

Ki hali, “U yemi mwahala mina cwale.” Mi ba hupula kuli na pulumuka, kakuli na sa zweleli mwa likolo za bona. Muñolo no li fa limota, mi ne ba si ka u ziba. Ne ba ipapata kuli ne ba libelela Mutu ya cwalo kutaha; kanti Nali mwahala bona. Kono ba palelwa ku Mu lemuha, ni ha ne ba bulela kuli ne ba Mu libelezi.

¹¹³ Ki nto yeswana fela, sina Majuda, kuli bateni, sina Bamacaba ni ba habo, kakuli ku polofitilwe ka mukwa o swana, ki nto yeswana. Neba bulezi kuli ne ba Mu libelela. Kono likopano cwale mwahala Bamacaba, lusika lwa Laodesia ki lwa libofu hahulu sina mo ne ba inezí, kakuli (kiñi?) ku polofitilwe kuli ba kaba cwalo. Lina ni ku ezahala.

¹¹⁴ Kambe fela Isilaele na ka lemuha sisupo sa hae, ne ba ka ziba nako ya ku bonahala kwa Mesia wa bona kuli ne i sutelezi. Kambe fela ne ba lemuhile!

Mwa ziba, ba—ba balutiwa neba bulezi cwalo ku Jesu. “Ki kabakalañi bañoli ha ba bulela, kuli, ‘Elia una ni kutaha pili?’”

¹¹⁵ Mi Jesu ki hali, “Elia utile kale, mi ha ba si ka mu ziba. Sa bile kale teni, mi ba mu bulaile kale. Ba ezize ona cwalo fela Mañolo sa bulezi kuli ne ba ka eza.”

¹¹⁶ Kambe fela ne ba ka lemuha, kuli “mufitelezi” wa tumelo yani na nyazize lika mwa buñata bwa zona kaufela zene ba ezize, na nyazize lika kaufela zene ba eza . . . Mi ali, “Mina baipi! Musike mwakala ku . . . Linoha mwa bucwani, mina lusika lwa libili, ki mañi ya mi lemusize kusaba kwa buhali bo butaha? Musike mwakala ku nahana m wahala mina kuli, ‘Luna ni Abrahama kiyena ndata luna. Luna ni *se, sani*, kamba *sesiñwi*.’ Kakuli Ni mi bulela kuli, Mulimu wakona ku zusa bana ba Abrahama kuzwa kwa macwe aa.”

¹¹⁷ Musike mwakala ku nahana kuli muna ni Katengo ka Lifasi mwa mazoho a mina, mi muna ni ma membala babatuna hande mwateni mwani. Mulimu wakona kuzusa bana kuzwa mwa lipeba za linyundi kutaleleza Linzwi la Hae; mahule, bazamai mwa mikwakwa, macakolwa, balauli. Wakona kueza cwalo. Yena usali Mulimu.

¹¹⁸ Likopano za libofu, sina Isilaele wa sibofu, sibeli sa bona ne ba polofitezwi kuba ona cwalo. Ni mi bonisa muzamao o swana, kufitela Ni fita fa sibaka se fo Ni bata kufita cwale. Ku foufazwa, sina ona—ona likopano za Bamacaba ba Lusika lwa Laodesia, mo li foufalezi kacenu sina mo ne ba inezi ka nako yani.

¹¹⁹ Lusika lwa Laodesia lu lukela ku amuhela Liñusa! Malaki 4 nekuizwe ba ka amuhela.

Kono ki sikamañi seba libelela? “Kopano ya luna ika Li tisa. Haiba ha Li tahi ka luna, ba Baptist, ba Presbyterian, ba—ba Assemblies, ba Oneness, kuna ni . . . haiba ha lu Li tisi, ha Ki niti.”

Kinto yeswana yene ba ezize ni mwa lizazi lani! Mi la taha ni kuya, mi ne ba sa li zibi. Ne ba si ka li lemuha, ni ha ne li taleleza Linzwi kaufela. Jesu ali, “Ba ezize sina mone ku bulelezwi kuli ba ka eza. Kona mo ba ka ezeza ni Mwana mutu,” Uka haniwa.

¹²⁰ Cwale mulemuhe, kwa swana cwale sina mwa mazazi a Bamacaba, kuya ka Mañolo a sepisizwe ka Malaki 4.

Ao, Jesu naize, “Liñolo kaufela li susumelizwe, mi hakuna nihaiba siemba sa Ona se si kona kusa talelezwa.” Hakuna mukwa w ku hanisa Mañolo ku talelezwa. Kaufela ona ana ni ku talelezwa. Mi Jesu na bulezi kuli aka ezahala. Mi fo lubona kuli li ezahalile. Lwa li bona.

¹²¹ “Kukutiseza” sikamañi, mwa mazazi a mafelelezo? Mina mizwale ba likopano, muiteeleze! Kukutiseza pentekota, mukiti wa makalelo. Inge mone U inezi kwa makalelo, kona mo Uka kutisezwa ku si ka lila kale mukiti wa Litolombita za Isilaele. Una ni ku kutisezwa! Kuna ni kuba sesiñwi se si ka eza cwalo. Malaki 4 ibulezi kuli ika kutiseza fateni Tumelo ya bashemi, kwa bana, se si ka ezahala.

¹²² Kambe Isilaele na ka lemuha Mesia wa bona, sisupo sene si sepisizwe, ne ba si ke kuba fo ba inzi kacenu. Haiba ne ba ka...Kono kiñi hane ba si ka eza cwalo? Kwa utwisa makeke. Kiñi hane basika eza sani? Kakuli Mulimu na bulezzi kuli ne basike baeza cwalo. Ki babakai baba lumela cwalo, muli, “Amen.” [Puteho ili, “Amen!”—Mu.] Mulimu na bulezzi kuli habana kuba cwalo.

Mi ki Mulimu ya swana ya bulezzi, mwa Lusika lwa Keleke ya Laodesia, kuli se si ka ezahala, mi kise fapila bona. Bakona kueza cwani sika kaufela kwanda kueza ona sani?

¹²³ Kambe ne ba lemuhile sisupo sa Mesia, sona sisupo sa Mwana mutu! Na tile ka libizo la Mwana mutu. Cwale, Nali mwa libizo, ka Lusika lwa Pentekota, mwa Moya o Kenile, Mwana Mulimu. Cwale, taba yetatama ki Mileniamu, ki Mwana Davida. “Bana,” babalalu, Mulimu ya swana. Yaswana, “ali Ndate, Mwana, Moya o Kenile,” Mulimu ya swana. Mwana wa Davida, Mwana Mulimu... Yena Mwana Davida, Mwana mutu, Mwana Mulimu, ki yena Mulimu ya swana nako kaufela, ki mwa liofisi fela ze shutana.

¹²⁴ Kona mwa inezi “Ndate, Mwana, ni Moya o Kenile” isiñi Balimu babalalu, kono ki Mulimu ya swana mwa likalulo zetalu, liofisi zetalu, kakuba Ndate, Mwana, ni Moya o Kenile.

Kono, sina kacenu, ba foufalizwe ka lizo sina nako yani, ku foufala ka sizo, haba li boni. Kiñi haba sa li boni? Habana ku libona fateni. Muhupule, seo KISONA SA BULELA MULENA.

Bali, “Kiñi ha u bulela cwalo he?”

Ki nto yeswana fela sina Joani mwa na ezelize, ki nto yeswana fela sina mo ne ba ezelize. Kuna ni kutabaka fa ni fani, zani lina ni kutaha hape. Oh, lingu za Mulimu, liutwa Linzwi la Mulimu! “Lingu za Ka liutwa Linzwi la Ka.”

¹²⁵ Musali fa lisima na lemuhile lizazi la hae, ka sisupo sa Mesia. Nali mwa buino bo bumaswe. Nasa lati kuikeza bukuba ni yeñwi ya likeleke za bona za kale zani, ka nzila yene baeza ka yona. Neba pila ka nzila kaufela, ni, lika zene ba eza, na sa lumeli mwa litaba zani. Kono na zibile kuli ne ku ka tana Alimuñwi ka zazi leliñwi. Yena kalibe yani ya shebile kwani, mwa musipili wa kuya kwa lisima; afumana sona Sika sana bata sani, mi ha Na kalile kupatulula ku yena kunutu ya mwa pilu ya hae, ku mu bulelela sibi sana pila ku sona.

Musali ali, “Muñaka, Ni lemuha kuli U Mupolofita.” Cwale, ne ba sina ni yomukana ka myaha ye mianda yemine. Ali, “Ni lemuha kuli U Mupolofita. Mi Ni ziba kuli Mesia ha kataha Uka eza ona lika zee.”

Mi yena ali, “Kina Yena.”

¹²⁶ Musali a lemuha. Nekusina puzo, “Ukona Ku li paka cwani?” Neku bonahalile kale. “Cwale Mesia ha kataha, se kona Sa ka eza.”

Kihande, haiba ukona kulemuha ka Mañolo, kikuli halukoni kulemuha Maseli a manzibwana ni sisupo za kacenu?

“Lu ziba kuli Mesia ha satile Uka lu bonisa lika ze kaufela. Uka lu bulelala zeo.”

Mi ali, “Kina Ya bulela ku wena.”

¹²⁷ Hakusana lipuzo hape. Ona fani sa ikela, mi a bulelala batu, “Amu tahe, mutobona! Ki Yo kwanu.” Hakusana puzo hape ku yena. Ne ku felile, kakuli na lemuhile lizazi la na pila ku lona. Na li lemuhile.

¹²⁸ Kona mwa na ezelize ni Natanaele, Muheberu yomutuna, fani hana boni sisupo sa Mesia sene si sepisizwe kwani; hakuna taba ka baprisita babañata cwani, kamba neli zeñata cwani zeñwi.

Ne li ezize sikamañi? Ne li lyanganisize baprisita, kubona batu bani haba zwa mwa likeleke ni ku ikela. Mi ali, “Haiba ufi wa mina kaufela uka fumaneha mwa mikopano ya Hae, uka lelekwa. Luka ku lelekela kwande a kopano ona foo.”

¹²⁹ Kona mo kuinezi kacenu. “Luka ku lelekela kwande a kopano ya luna haiba ukaba mwa mikopano ya hae.”

¹³⁰ Mwa hupula muuna wa sibofu? Bo ndatahe ni bo mahe neba si ka alaba mane; neba saba. Kakuli, ne baize, “Mutu kaufela yana ya ku yo bona Jesu, kamba—kamba kuba mwa mikopano ya Hae, na ka lelekelwa kwande.” Kono, muuna wa sibofu yani na ipulelezi ili yena, ya nali sibofu fa pili na konile kubona cwale.

¹³¹ Na, ya nali sibofu sapili, na kona kubona cwale. Na, yana sa zibi lika zee, Li zibisizwe ku na ka Moya o Kenile. Amu tamuluhe, likopano, kakuli za taha, ni hakuli cwalo! “Haiba Ni nanulwa kuzwa mwa lifasi, Ni ka bizeza batu kaufela ku Na.”

¹³² Natanaele na lemuhile cwalo. Na zibile cwalo.

¹³³ Kuswana fela sina litaba ze paka Mañolo a Mushe, Linzwi le li pakilwe. Mushe na zibile kuli yani neli yona sepiso ya lizazi lateni, kakuli neli Mañolo, hakuna taba ka bunca. Na ize, “Ki mañi ye Ni ka ba bulelala . . . Ni ka ba bulelala kuli Ni boni Liseli kwanu mwa lihalaua. Kana Ni ka ba bulelala cwani cwale kuli ne kuna ni Liseli kwa mulaho kwanu, mi Liseli le li ni bulelezi kuya kulo kwani?”

Mi ali, “Kaniti, Mushe, Ni kaba ni wena.” Mi isiñi fela . . .

¹³⁴ Na si ka iponahaza Iliyena kwani mwa Egepita; ka limakazo fela ni lisupo. Kono ha Na ba kopanyize kaufela bona hamoho, A bonahala ku bona hape, ni ku paka bulumiwa bwa Mushe fapila Baketwa ni baba bizizwe. Fani mupolofita yani hana ba kauhanyize kwa naha yani ni ku ba tisa mwa sibaka, mi Siita sa Mulilo sa bonahala hape, mi neli fa Lilundu la Sinai.

¹³⁵ Mu li bapanye ni kacenu. Hmm. Amen! Ku lumbwe Mulimu! Li fitelela bupilo kuna. Lilimo za ka likala kusa ekezeha, mi Ni bona hola ya ku sa ikuteka mi butanya bu hatelezi mwa linaha ni lika kaufela, mi Ni talima kwa mulaho ni kubona se si ezahalile. Pilu yaka ya tulaka bakeñisa tabo, ka kuziba kasamulaho nyana tabernakele ya mubu ye ha se i sinyehile, kono Ni na ni yeñwi ye libelela kwa buse. Ni lika kuhoha sicaba, kuba kauhanya kwa lika ze ni lika zeñwi, ku ba hohela kwande; ku babonisa, ka Mañolo, kuli Mulimu uyemi fani; ana ni ponahazo ya Siita sa Mulilo, seo mianda anda ni likitikiti li boni, mi mane bana ni Sona si kopilwe, fateni, ni kamera, nako ni nako, ili kupaka cwalo.

¹³⁶ Balikanyisi ba taha. Luli, sina ni ku ezahala. Balikanyisi ne ba tile mwa lizazi la Mushe mi baeza lika ze swana. Mulimu ali, "Ikauhanye ili wena, Mushe. Usike wa fumaneha mwahala bona. Ni ka ba miza." Mi lifasi la ba kwahela. Mi cwalo kona mo kuinezi kacenu; mukute kwa mulaho mwa lifasi, tutengo twa mali ni lika zeñwi kaufela. Mwabona?

¹³⁷ Ki sisupo sa Mañolo a Mushe! Nali yena—nali yena mupolofita yomutuna wa Mulimu yana ile kwani ku yo ba lamulela, mi ba lemuha cwalo. Ne ba lemuhile sisupo. Nali sepiso luli ya Mañolo, ye ne talelezizwe.

¹³⁸ Jesu nali yona sepiso ya Mañolo yani, yene pakilwe ku musali. Kamba, Nali yena Toloko. Jesu neli yena Toloko ya Mañolo. Bupilo bwa Hae Kasibili ne bu toloka Mañolo.

¹³⁹ Kana hamuboni Liñusa la hola? Kikuli mwa lemuha fo lu inzi? Liñusa lona kasibili, kuzwa mwa Mañolo, la mi tolokela hola ye lupila ku yona. Ki yona toloko.

¹⁴⁰ Jesu naize ku Isilaele, "Kambe u lemuhile lizazi la hao." Nako yeñwi, hana inzi fa Lilundu la Olive, A talimwafafasi, ali, "Jerusalema, Wena Jerusalema!" A lila. A talimafafasi. A bona.

Isi ka kuswana kufi kaufela, mwendi, nzila. Busihu bobuñwi, kakusasana omuñwi, bukaufi ni teni kiloko, hane Ni boni keleke ya lihule yani. Mwa pilu ya hao, u ikutwa kuba ni miyoko ya Moya o Kenile.

"Jerusalema, Wena Jerusalema, Ni ka ku bukeleza hakai. Kono uezize sikamañi? U bulaire bapolofita be Ni ku lumezi. U ba bulaile."

Mi Mañusa a lumezwi kwa keleke, kacenu, ba bulailwe ka lituto za litumelo za bona. Mañolo a bulailwe ka lituto za bona

za litumelo. Jesu naize, “Kambe u lemuhile lizazi la hao! Kono, se ku fitile nako cwale, nako se i felile cwale.” Kona mo kuinezi ni likeleke!

¹⁴¹ Na lumela, ka pilu yaka kaufela, i fitelezi kuliululwa. Hakuna taba kamba mubata ku nahana sikamañi ka yona, ki munahano wa mina fela. Wo ki waka. Mwabona? Ha mu lukeli kuba ni munahano wa ka. Kono Ni lumela kuli i fitelezi kuliululwa, mi se ibile cwalo, ka myaha ye ketalizoho kamba ye silezi kwa mulaho. Na hupula. Mwa hupule Chicago. Mubone se si ezahalile kuzwa nako yani, mi mu si talime hanze si ezahala. Mwabona? Muhupule, libizo la ka li fapila zona. Li ñozwi fateni. Kakuli KISONA SA BULELA MULENA. Mubone haiba ha si kawa, muzwelepili.

¹⁴² Mutualime mwa 1933, mo i bulelala ka basali mo baka ezeza mwa mazazi a mafelelezo aa. Mo i bulelala ka batu... Kamo Mussolini, mwa na tilo felela. Mane ni Hitler mwa na ka felela ka ku sabisa. Kuli mane mihala yemilalu ya kutwano i kataha mwa swalisano. Kuli mane mishini mo ika tela, ye ka bonahala inge lii. Ni mo basali ba ka tinela liapalo ni ku bonahala inge baana, mane nihaiba tunekunda twa bona; mane ku to fita haba ka tinanga matali a feiga, cwalo, ku bona. Mo ba ezeza matanya, mo ba ka ezeza mwa lizazi le. Mutualime se ba ezize. Mi ki seo fapila mina, cwale.

¹⁴³ Haiba basali ba Sikreste fela neba ka... bona baba ipiza kuli ki basali ba Sikreste ne ba ka lemuha fela, hane ba ka lemuha kuli moyo wa butanya o kubona ki wa diabulosi, o ba eza kuli ba kute milli ya bona. Diabulosi ki yena fela ya kona kueza nto ye cwalo. Zeo za shutana kwa Linzwi la Mulimu ku mina, kuswana fela mo ne kuinezi mwa simu ya Edeni. Ne ba ezize sikamañi? Kambe ne ba lemuhile fela! Balika kubulela kuli, “Oh, mukutazi yomunyinyani wa kale mupikuluhi ya kenile yani, za bulela!” Ha ki na. Ha ni mi buleleli sa kueza. Ni bulela fela Linzwi. Kambe ne ba ka lemuha fela kuli ki diabulosi.

¹⁴⁴ Ba ipiza kuli ki Bakreste. Jesu naize, “Muka Ni biza cwani kuli, ‘Mulena,’ kanti ha muezi lika ze Ni bulela kuli mueze?” Ha bakoni kuba Bakreste. Ha ni muatuli wa bona, kono Ni bulela fela se li bulezi Linzwi. “Muka Ni biza cwani, ‘Mulena,’ ibo ha muezi lika ze Ni bulela kuli mueze?” Mi Linzwi ka kutala fa ki sinulo ya Jesu Kreste. “Muka Ni biza cwani, ‘Mulena,’?”

¹⁴⁵ Kambe ne baka lemuha fela kuli ki diabulosi, ki moyo o maswe. Basali babañwi babande ba banyinyani kwande...

¹⁴⁶ Ni sepa kuli se kona sibaka sa butanya hahulu ku ze Ni kile na bona mwa bupilo bwaka, Jeffersonville, Indiana, ka basali baba mapunu. Ni bile mwa Hollywood. Ni bile kai ni kai. Ni bile mwahala lifasi kaufela, mi Ni boni mifuta ya masila kaufela. Ni li boni mwa Paris. Ni li boni mwa England, ki yona yeli mulena wa zona kaufela.

¹⁴⁷ Ni sepa kuli England ika tiba zazi leliñwi mwatasa liwate. Ya lukela cwalo; busafa, masila, ye nyinyani! Wani ki musima wa ku sululela masila wa lifasi, oli kwahule hahulu ni mañolo, ku latula batu bao Ni kile na bona mwa bupilo bwaka. U sa bile seo u hanile Niti.

¹⁴⁸ Billy Graham na bulezi kuli na isize musala hae kwande kwa mishitu; lika za buhule ne liezahala mwahala baana ni basali, bashimani ni basizana, ona mwani mwa libaka za lipapali mwa mishitu, patalaza. U fetuhile lisima la ku sululela masila; kona mwa bezi ni France, ku cwalo ni ku babañwi kaufela ba lifasi. Mi ni cwalo kona mo ibezi United States, seili mueteleli wa bona!

¹⁴⁹ Mutualime za kacenu. Baba eza kuli bakute milili yabona, batina tuputula, tulukwe, bazuba, mi baipiza ili bona kuli ki balumeli. Kana ha mulemuhi, kezeli, kamba musali . . . Ni talusa, muniswalele, isiñi kezela ka; ya kona kueza nto yecwalo. Kikuli ha mu lemuhi kuli ki diabulosi? Kono seo . . .

Sina Majuda ba kale, ha mu lumeli Linzwi le li pakilwe ha Li bonahalile ku mina. Mu kumalela ona cwalo kwa lizo za kopano ya mina ze bulela kuli ku lukile. Mu bululela ka malimi, mu tulela mwa halimu nifafasi, mu opelela mwa moyo, ni kukuta milili ya mina. Kana mu nahana kuli Mukreste wakona kueza cwalo?

Ni boni mioya ye maswe, Ni boni liñaka, Ni ba boni haba bulela ka malimi ni kutoloka, ni kutulela mwa halimu nifafasi ni kubinela mwa moyo; kunwa mali mwa katendele ka mutu, ni ku lwaha Libizo la Jesu Kreste.

¹⁵⁰ Mu li, “Ni wa kwa keleke. Haleluya! Kanya ku Mulimu! Ni . . .” U wa siemba sifi?

Keleke ki Linzwi! Mi Linzwi libulela kuli, “Ki maswabiswa kuli u eze cwalo.”

Mina sicaba sa Bafarisi ba libofu, mu zamaisa bana ba banyinyani ku baisa kwa lihele ona cwalo; kakuli mu saba ku sa holisiwa pene ya sico, mi ni kuli mu ka lelekiwa mwa kopano ya mina haiba mukala nto ye Cwalo. Maswabiswa ku mina, wena muipi! U swabele zeo. Unzo bona kuli hola i sutelezi sina cwana, kono wena u sikuluha ka lizo za hao ni kuba kwahule ni Linzwi la Mulimu. U lemezi cwani, wena sibofu tuwe!

¹⁵¹ Kana Bibebe haibuleli kuli u sibofu? Kikuli ha utwisisi kuli u sibofu? Bibebe ibulezi kuli u cwalo. “Mi u mapunu, u nyandile, u mwelwa, us sibofu, mi ha u zibi.” Ha mu nahana kuli muna ni keleke yetuna hahulu mwa muleneñi, mi mueza *se*, *sani*, kamba *sesiñwi*; mi Bibebe ibulezi kuli u mubotana ka mo kona kubela, mi u sibofu. Kono Yena u sa yemi fa munyako, ulika ku mi lekisa mulyani wa meeto; isiñi ku mi lekisa ona, kono wa mifa ona, mi mu palelwa ku u amuhela. Ku taleleza Mañolo.

¹⁵² Ki lizazi mañi le mupila ku lona, sicaba? Kana mwa lemuha hola, kulemuha sisupo?

¹⁵³ Ne ba lemuhile fela, bona basali, bani kuli ki diabulosi. Ki diabulosi ya sina likute, ka libizo la bulapeli. Ubile cwalo kamita. Na tile ku mupolofita kaufela, u tile ku muituti kaufela, mi hape natile ku Jesu Kreste, kakuba inge mutu wa bulapeli. Mi Bibele ibulela kuli “ukaba fa kaufi hahulu mwa mazazi a maungulo,” mane ni mwahala Mapentekota, “mi uka puma ni bona baketwa kasibili,” kuzwa mwa keleke yani ya Pentekota, “haiba neikaba nto ye konahala.” [Hakuna manzwi fa tepu—Mu.]

¹⁵⁴ “Ba balikani,” Na ize, “kakuli munyako wa kumbama mi nzila ki ye sisani, mi ki ba balikani fela baba ka i fumana. Kakuli ona mone kuinezi mwa mazazi a Nuwe, mone ku pilisizwe fela miyo ye ketalizoho ka yemilalu, ki mo ku kabela ni ha taha Mwana mutu.” Munahane ka zona! Ki lizazi mañi le lupila ku lona? Kana mwa lemuha hola yateni, mwa lemuha lizazi naa?

Ni zamaya ka kuiketa, kono Nina ni mizuzu yelikani fela. Mwabona?

¹⁵⁵ Kueza kuli ba kute milili ya bona. “Kihande,” ba li, “keleke ya luna ha i tokomeli ze cwalo.” Mwa ziba libaka? Ki libofu.

“Hakuna butata kukuta milili ya hao.” Bibele ibulezi kuli ku cwalo! Mane ki nto ye shwaukisa kuli mukute milili ya mina mi kipeto mulapele.

Mu li, “Kihande, musali ulukela ku ikapesa.” Mi Bibele ibulezi kuli “milili” ya hae kona mukabo wa hae. Isiñi kuwani; milili ya hae!

¹⁵⁶ Ku cwani kambe Mushe naize, “Ni ka tubula kuwani yaka mwa sibaka sa makatulo”? Kambe ne li si ka beleka. Mulimu naize “makatulo,” mi Mulimu utalusa makatulo.

Na ize “milili,” isiñi kuwani! Kanya ku Mulimu! Na lata sani, Na sepa. Ku lumbwe Mulimu! U talusa fela Sa bulezi. Mañolo haana toloko ya kwa mukunda. Zeo hali talusi fela kopano ya henu; Li talusa ona cwalo mo Li bulelala fela, mi Yena ki yena mutoloki.

¹⁵⁷ Muli, “Na ziba musali ya ezanga cwalo.” Hanina taba ka so ziba. Na ziba Mulimu sa bulezi ka sona. Mu ibapise mina bañi.

¹⁵⁸ Kambe ne ba ka lemuha fela seo sili sona, kalibe. Uh! Kambe no ka lemuha fela! Kamba, “musali,” isiñi kalibe.

¹⁵⁹ Ni bona sisupo, hane ni zwa kwa Blue Boar, ka ku shetumuka, Na sepa ki Mukwakwa wa Buketalizoho kwani, sintolo sa bucwala, neku izwe, “Litafula za likalibe.” Se ni yema fani; Na li, “Mwali kuba mube ni iliñwi.” Kalibe hakoni kukena mwa sibaka se si cwalo. Musali wa kona, kono isiñi kalibe.

¹⁶⁰ Kana mu lemuile, kuwa kwa lifasi ne ku kalile ka musali wa litanya? Kana mwa ziba kuli lika fela ka nzila yeswana, ka butanya bwa musali? Mi keleke, i yemelwa, ka musali? Keleke ki musali, kubulela ka moyo.

Kona mwa inezi ni Munyaliwa haba musali, kubulela ka moyo.

¹⁶¹ Butanya bwa keleke, mo buinezi! Mutualimele lipono, mutualimele lika ze, mubone lipono za fa Mulimu, mi pono yani ki ya niti. Ni beile Bibele yaka fa pilu yaka, ku mina sicaba fa tepu; sicaba sa kona kubona cwalo. Ni boni cwalo! Mulimu Yamata kaufela kuziba kuli ki Niti. Ne ni si ka ziba kufitela cwale. Ki yani faale, “u mapunu, mi ha zibi cwalo.” Na sweli fela kuba ni nako yende. Ki fohe cwale.

Kono cwale Munyaliwa yomunyinyani yani ha na tilo iponahaza, ne ku shutani. “Yena Alfa ni Omega!” Uh-huh.

¹⁶² Ki diabulosi ya eza cwalo. Kono sina Majuda ba kale, ha ba bona Linzwi...

Mi Jesu ali ku ba Hae, Na bulezi zeo kwa balutiwa ba Hae, “Mubale Mañolo. Mina, mwa ziba, mwa lyanganeha ka za Ka ni bulumiwa bwa Ka. Mubale Mañolo. Ku Ona mu nahana kuli muna ni Bupilo Bobusafeli, mi ki Ona apaka za Ka, A mi bulelela seo Liñusa la Ka lili sona. Haiba hamukoni ku Ni lumela, mulumele neba Manzwi kasibili ao Mulimu asweli kutoloka ku mina.”

¹⁶³ “Haluna kulumela kuli Muuna yo a lu buse. Luna ni baprisita ba luna, ni zeñwi cwalo.” Muzwelepili fela kanti, kona fela ze kona ku bulelwa. Ha ku sa konahala, ni hakuli cwalo. Mwabona? Lizo za likopano ze bulela kuli ku lukile, ba teezea ku zona. Bakona ku tabela ku teezea... Mwa lumela za—za linzwi la—la mutu kufita mo mu lumelela Linzwi la Mulimu. Ha ba lemuhi. Likeleke kacenu ha li lemuhi Timotea Wabubeli 3. Haiba mwa...

¹⁶⁴ Ni bona kuli mina babañwi musweli kuñola Mañolo. Cwale, ao ki Mañolo o Ni sweli kubala ku ona cwale. Ko, haiba kuna ni yaka ni buza sesiñwi ka ona, kamba kubata maikuto aka ka ona, Na kona kuba bonisa Mañolo a ona. Mwabona?

¹⁶⁵ Haba lemuhi Timotea Wabubeli 3, fo Ibulezi kuli, “Mwa mazazi a maungulo, batu ba kaba baitati, baba itutile hahulu, baba lata hahulu minyaka kufita kulata Mulimu, lishembi, baba seba batu ka buhata, baba sa itumeli, baba toyta batu babande (kutoya Munyaliwa), mwabona; ba kaba ni mukwa wa bulumeli, kono ba latuzi Mata abona; ku baba cwalo musabe kwateni. Ku bona kuna ni baba nanalela mwa mandu, mi ba swasa basali nyana, baba imezwi ki libi baba yaulukiswa ki litakazo zeñata, baba sika ituta kamba baba palelwa kufita fa zibo ya ku ziba Niti.” Kutokwa! Habana kueza cwalo, mi ki mo baka shwela kueza cwalo. Mulimu ubulezi cwalo.

Mi, Bafarisi ba libofu, kana ha muboni nji? Ha ni si ka nyema; Ni sweli fela kutitimeza niti mwahali ni ku itiisa. Mane nihaiba likeleke ha li lemuhi Nto ye. Basali haba li utwisisi. Ba lukela ku . . . “Basali ba likuba, baba yafulukiswa ki litakazo zeñata,” Hollywood, ona mikwa ye kaufela, kukuta milili, kutina tuputula, kutola mipende, ona mikwa ye kaufela, ye sa swaneli. Kana mwa ziba kuli musali una ni kalulo yetuna mwa mazazi a maungulo?

¹⁶⁶ Mwa ziba Bibele ibulezi, kuli, “Baba ka banduka kwa sinyeho ye ikaba mutai o munde fapila Mulena”? Zazi leliñwi Ni ka fita ku zona, haiba Mulena a alata, ku zona, ka mina basali. Kuli mubone seo Mulimu a nahana ka musali ya bandukile luli kwa sinyeho ya lizazi le. Ali, “Ukaba musali yomunde.”

¹⁶⁷ Ne ni utwile musali, zazi leliñwi, yana seha . . . Neli musizana, neli sikwata sa likalibe zene tinile fela ka ku bonisa mapunu, ba buiswalo bo bu kwatasi hahulu mane kufita—kufita nja ya musali, ne ba sweli ku seha musali muhulu yana tinile ndelesi yetelele. Muteeleze fa, wena musali ya lyanganí, una ni sesiñwi so sa zibi. Una ni buiswalo. Mane ha uzibi ni seo libizo lili sona. No li latehisize mwa bulobalo bwa hao, cwalo. Mane ha uzibi nihaiba bunde kwa bumaswe; yena wa ziba. Una ni sa patile mwa pilu ya hae so sa zibi sesiñwi ka sona. U li latehisize; haukoní ku li fumana. Usike wa mu biza kuli usialezi, ni zefñi, ze cwalo. Una ni sa ziba seo wena u sa zibi. U li patile mwa pilu ya hae, ki sibiana sa likute. Wena hakuna nihaiba linzwi lelikana lo zina ka zona. Bo mahó ba ku hulisize ona cwalo. Mulisana wa hao na li lumelelize; si bonisa fa yemi. Ni kutaha za hae cwale fa. Mwabona? Mwabona fo mu inzi, mina likeleke?

¹⁶⁸ Jesu naize, “Mañolo a kaufela ana ni ku talelezwa.” Mi A talelelizwe.

¹⁶⁹ Mulemuhe, “Sina Janise ni Jambresi hane ba lwanisa Mushe,” uka taha ona cwalo, babañwi ba bona. Isiñi, cwale, ha buleli ka ba Methodist, Baptist, fa; haba yo mwa siswaniso. Mwabona? “Kono sina Janise ni Jambresi hane ba lwanisize Mushe ni Aruni, kona mo ba ka ezeza; batu ba mihipulo ye keluhile kwa Niti,” ba keluhile mi bakeni mwa lituto za litumelo ni lituto za keleke, mwa sibaka sa Bibele.

Mi cwale Janise ni Jambresi na kona kueza sika kaufela sa na eza Mushe. Mwabona, “sina Jambresi,” mwabona muzamao ka kuswana foo?

“Sina Janise ni Jambresi mo ne ba lwaniseza Mushe, ku cwalo ni baana ba ngana ye keluhile kwa Niti, musabe ku Zona,” hamuna kuba ni Zona mwa libaka ze mubapani ni zona, mane habana nihaiba ku lumeliana ni Zona, habana kuba ni za kueza ka Zona. Kono bali, “Bukuba bwa bona buka zibahala.” Mi Munyaliwa yani hakanga sibaka sa Hae ni kuya mwa halimu mwa mbyumbiyulu, li ka zibahala, musike mwa bilaela; sina

Mushe, fani hana ngile bana ba Isilaele, ni ku kalisa musipili wa kuzwa mwa Egepita, mi Egepita ya tiba. Ku lukile.

¹⁷⁰ Jesu naize, "Liñolo kaufela li susumelizwe, kabakaleo Liñolo kaufela lilukela ku talelezwa." Fani Hana . . .

Hane ba Mu buzize, bali, "U ikeza kuba Mulimu Wena."

¹⁷¹ Ki hali, "Mina, mwa mulao wa mina, mubiza bapolofita bao Linzwi la Mulena ne litahile ku bona, muba biza kuli 'balimu,' mi ba cwalo." Ali, "Cwale mukona ku Ni nyana cwani ha Ni bulela kuli Ni Mwana Mulimu? Mañolo a kaufela a filwe ka susumezo; kaufela Ona alukela ku talelezwa, kaufela Ona alukela ku talelezwa."

Mubone foo, ki libofu hahulu, ne ba ngilwe hahulu ka linzwi la mutu kufita kungiwa ka Linzwi la Mulimu. Sani kona se sitiseza basali kueza cwalo. Sani kona se si tiseza bakutazi kueza cwalo. Ba ngilwe hahulu ki bushopu kufita Jesu. Ba ngilwe hahulu ku zona, hamoho ni—ni mukotana wa masheleñi a bona, ni kopano yetuna.

¹⁷² Kubona fela haiba Ni ya zibahala. Kunga sicaba, kuzwa mwa Jeffersonville, ni sikuwata nyana sa batu ba mwa Jeffersonville; kunga ba kwande, a Jeffersonville, kuzwa mwa tabernakele ye kakusasana cwana, Ne ni sike naha nihaiba baba silezi ba ku kutaza kubona. Ki sikamañi seo? U bizizwe kuzwa mwahala na ha kaufela; kuzwa kwa New York, kuzwa kwa Massachusetts, kuya kwa Boston, Maine, Tennessee, Georgia, Alabama, ni mwahala na ha. Basweli ba kopana hamoho. Amen! Seo kona sa Na bulezzi. "Ku kaba Liseli mwa nako ya manzibwana."

¹⁷³ Ha bakoni kulemuha Liseli la manzibwana. Bwani kona butata. Fela ha Li lemuhi. Seli sibofu hahulu. Bibebe ibulezi kuli nali cwalo.

¹⁷⁴ Russia na amuhezi sibaka sa hae mwa lifasi, mwa sayansi, ha ki kale hahulu kufita lilimo ze mashumi amane kwa mulao. Mwa ziba, fani Ndwa yetuna ya Pili ya Lifasi hane itile, bali kuba . . . Neba si ka iseza ngana kwa Russia. Muzwale Roy . . . Neli fela sishañata sa linata zetuna, bani ba Siberian babatuna ba kale, milelu kwa lifateho za bona kaufela, mi ne ba sa zibi lizoho la nzohoto kwa lizoho la silyo. Yeo ki niti, Russia, kono na lemuhile sibaka sa hae. Nana ni kueza cwalo kuli ataleleze Mañolo. Mwa ziba sipolofita saka ka ze ne Ni bulezzi kuli li ka ezahala, kuli mane kaufela zona li ka kopanela mwa swalisano. Cwale u etelezi lifasi mwa sayansi. Lu sialezi hahulu kwa mulaho ku yena. Kaufela baba siyezi ba lifasi ba kwa mulaho wa hae. Wa zamaisa sibaka sa hae. Kona a sa zo lemuha fela kuli una ni ngana, ni yena.

¹⁷⁵ Mulemuhe, mutu una ni maikuto a silezi ona maikuto aswana ana nani myaha ye likiti ze silezi kwa mulaho. Myaha ye likiti ze silezi kwa mulaho, ka maikuto ana nani, a lumelelana ni ndu ya lifasi ni ku sebeleza Mulimu. Mi cwale, mwa myaha ye

supa ni ye ketalizoho kwa mulaho, mutu yani u shimbukile kuzwa fa pelesa ni sikocikala, kufita ku mufufisi wa fulai ya jeti. Kiñi? Na shimbukile kuzwa kwa tumelo ya hae ku Mulimu, ni ku li shimbulela kwa maikuto a hae ni mata a hae ka kuba mutu. Kana mu lemuhile cwalo? Na tuhezi ku sepa Mulimu. Sa i sepa iliyena.

¹⁷⁶ Inge musali yana sa lumeli za bumulimu yo. Ki yena mañi libizo, Washington kwani, yana cincize zeo kaufela? [Yomuñwi uli, "Murray."—Mu.] Ki yena mañi libizo? ["Murray."] Murray, musali naize, "Ibile fela luna ni mpi nifafasi ni masole ba mwa mezi, halutokwi Jehova wa kale." Uh-huh. Hanina taba ka ze lu nani.

Ki Jehova kamba kutokwa, ku na. Mutuhele masole bafafasi ni ba mwa mezi batibe, mi ba kaba cwalo, kono Jehova ukaba cwalo kamita. Ibile fela Ni siemba sa Hae, ni mwana Hae, Ni ka siala ni Yena kuyakuile; ha ki ka pizo ya ka kamba tato yaka, kono ki ka keto ya Hae. Amen, amen! Ne ni sina sa kueza ka sona. Ki Yena fela! Munife Yena kamba munife lifu. Mutuhele linaha zuhe ni kuwa; Jehova uka siala. U ezize cwalo, mwahala masika kaufela; mi Rome hana wile, mi Egepita hana wile, ni babañwi kaufela hane ba wile. Mi Yena u sa siyezi ali Jehova. Oh, haleluya! Ni ikutwa bulapeli.

¹⁷⁷ Libaka leo Russia neina ni kuikupula, neina ni kueza cwalo. Kuswana fela inge Isilaele mone ikenezi mwa naha ya habo. Mulimu nana ni kuisa Isilaele kukutela kwa mubu wa habo, kwa Litolombita. Mi kona mwa na ezelize Mulimu ha zusa Russia kulo kwani, mwa swalisano, ili kueza ona cwalo sene si sepisizwe ku ezahala.

¹⁷⁸ Mutu ni maikuto a hae a silezi kona hanatile fela, pelesa ni sikocikala, ku sepa Mulimu. Mwa lilimo ze mashumi a supa ni ze ketalizoho ze fitile, a tuhela ku sepa Mulimu. Hane ba nyatezi mulao wa naha ye ya United States, neba beile Mulimu mwa lika kaufela zene baeza. Kono cwale habasana nihaiba mukopano, mi mane haba sa bizanga nihaiba Libizo la Hae. Yeo ki niti. Ba itingile fa butuna bwa sayansi ya bona, bona, butali bwa bona bwa za sayansi; ki sikwata sa ba litakazo. Yeo luli ki niti. Lifasi kaufela li mizizwe mwa butimbi bwa kusa ziba Bibele. Haili bi-... lifasi kaufela li zwile ku Mulimu.

Kono, munahane fela, mwahala ona lika zani kaufela, ni likopano za likeleke ni litakazo za mikopano ya bona ni lika kaufela, Mulimu sa ngile Linzwi la mupolofita wa Hae ni ku zusa kwateni Munyaliwa ya ka lumela. Uize Uka eza cwalo. U kumuzwi kuzwa sika sani sa Na sejisize kuli Uka si eza.

¹⁷⁹ Ba itingile fa butali bwa bona bwa butu, ona sayansi ya bona ya butu, ni zeñwi cwalo; ba siile Mulimu kusili, Yena ya na sepa sapili. Ba United States ba siile Mulimu kwande. Mane ne ba Mu siile kwande mwa likolo, kakuli ba luna ba banyinyani ha

ba sa utwa mane za Hae. Ba Mu zusize mwahala likolo. Cwale balika ku Mu zusa ni fa ma dollar, "Lu sepile ku Mulimu." Baka li zusa ni mwa buitamo bwa likute kwa ndembela, "Naha iliñwi mwatasa Mulimu." Baka zusa zani kaufela.

¹⁸⁰ Mwabona, bakeni mwa maikuto a bona a mubili maikuto a munahano. Kakuli, mwa lilimo ze mashumi asupa ni ze ketatalizoho ze fitile, ha si ka cinca ni hanyinyani mwa maikuto a hae, yena usali mutu ya swana yo Mulimu na bupile kwa simuluhu.

Kono, mwa mazazi a mafelelezo a, kikuli hamu lemuhi fo lu inzi? Mi keleke i hanile, kuzwa ku Mulimu, ku sani, kwa mukopano ni kutwisiso, ni zeñwi cwalo, kufita kuba Linzwi. Mane habasa Mu lemuha mwa mikopano ya bona, mwa likolo za bona, kamba hakuna, ni hanyinyani.

¹⁸¹ Isilaele, mwa myaha ye fitile ye mashumi amabeli ka aketalizoho, i lemuhile kuli kuna ni se si ba kenyize mwa naha ya habo, sina mone ku sepiselizwe. Ha ba zibi mo ne likile za ezezwia. Ne ba nyanda sina lika kaufela, bu bulaiwa, mwatasa Litolombita zani, kono ba inzi mwa naha ya habo. Ha ba zibi libaka.

¹⁸² Ki kabakalañi Russia ha i zuhile? Ki kabakalañi linaha ha li zuhile? Ki kabakalañi mutu hakonile kupunuha? Fani ba sayansi, lilimo ze mianda ye mihalu kwa mulaho, mutu wa sayansi wa mu French na pikulusize mbola ka lubilo lo lutuna fasasi, mi a bonisa cwalo, ka lipatisiso za sayansi, "Haiba mutu akile aba ni lubilo lo lutuna hahulu ka limaili ze mashumi amalalu fa hola, mulao wa bukiti wakona ku mu nanula kuzwa fasasi; kuya ka bukiti bwa hae, ku yaka bukiti bwa mbola." Cwale fa wakona kuya ka limaili ze likiti ze sebentini fa hola, mwabona, u sa lika ku pahama ona cwalo. U lemuhile fela sani, cwanoñu nyana. Ki kabakalañi? Una ni kuba ka nzila yeo.

¹⁸³ Kini, keleke ne i yemanga fa licwe la Jesu Kreste. Hakuna taba kamba mutu na ka bulela ze cwani, ne ba pila hande ka Linzwi, lona liñusa la hola; Luther, Wesley, ni ku shetumuka ona cwalo. Mi cwale ba keluhezi kwa lizo. Kini ha ba ezize cwalo?

¹⁸⁴ Lilimo ze mashumi amabeli ka ze ketatalizoho kwa mulaho, Isilaele i lemuhile fela kuli bakeni mwa mubu wa habo bona ku sesiñwi. Ne ku polofitilwe kuli baka kopana hape; Hosea na bulezzi cwalo. Lu ibaile nako nyana. Mulimu alutuse ku li utwisisa! Ku lukile.

¹⁸⁵ Ka nako yeswana, Munyaliwa u lemuhile Liseli la manzibwana, kele akala kulemuha. Mapentekota baba lapile ba kalile ku lemuha kuli likopano zani halina lika ni zekana ze ne ba bata, ba katezi mi ba zielehile. Mwabona, seli nako ya temuho, temuho. Muna ni kulemuha.

Lifasi li lemuhile. Linaha li lemuhile. Sayansi i lemuhile. Diabulosi u lemuhile kuli seli nako ya kona ku sinya basali, ku sinya keleke, ku sinya sicaba. U lemuhile cwalo.

Mi Mulimu u lemuhile kuli kuna ni sicaba fa lifasi sa Na lelezi kwa Bupilo. U lemuhile kuli ye ki yona nako ya kuluma Liñusa la Hae. U ezize cwalo. Sicaba si Li lemuhile, nako ya Munyaliwa se i lemuhile Liseli la manzibwana.

¹⁸⁶ Kambe Sodoma na lemuhile mazazi a hae, fani hana boni balumiwa bani ha ba taha cwalo, inge Billy Graham ni Oral Roberts!

¹⁸⁷ Cwale, mutu yomuñwi ya talifile mwa Phoenix na tilo nanuha fela ni kubulela kuli... aliza siemba sani fa—sa tepu, mi ali Ne ni bulezi cwana fa, Ni “swanezi ku kolobezwa ka Libizo la Jesu,” abulela cwalo. Mi ki hali, “Cwale mubone fa, ona fa abulela kuli...” Hane Ni bulela ka za Africa, mone ba kolobeze halalu kutalima kwa pata, ni kwa mulaho. Ali Ne ni bulezi kuli, “Hakuna shutano ni yekana.” Mwabona, wa kona kuliza ze siyezi kaufela za tepu yani; ona siemba sani fela, ni ku itima.

Kanti, ikona kuba mulatu mane kutomiwa ka kueza cwalo. Matepu ani a lumelelizwe ka mulao. Hakuna ya kona ku a lyanganisa. Kihande musike mwa nyamatala cwalo. Mu—mu—muna ni mulao ku mina. Kono kikuli lwa kona kueza cwalo nji? Batili. Ki hali, “Muba tuhele ona cwalo.” Mulimu uni bulelezi se si ka ezahala. Mutualimele fela, mu talimele fela muuna yani hande. Mwabona?

¹⁸⁸ Ka nako ye swana, Munyaliwa ya swana u lemuhile Liseli la manzibwana.

Kambe Sodoma na ka lemuha hola ya hae!

¹⁸⁹ Cwale, yena mutu ya swana yo yana beile tepu yeo, ali, “Talima fa, ku mina sicaba sa Pentekota,” ali, “ni mina ba Baptist. Muuna yo, ki mupolofita wa buhata, William Branham,” mwabona, “ubulezi kuli Oral Roberts ni Billy Graham nebali mwa Sodoma.” Mwabona, kipeto wa tima tepu ona fani; ku felile, mwabona.

Na sa zwelipili kwa pata kone ibulela, kuli, “Nebali balumiwa kwa Sodoma.” Isiñi mwa Sodoma, “Naliteni kwani kakuba numwana kwa Sodoma.” Mutu kaufela wa ziba kuli Ne ni bulezi cwalo. Mulize tepu ya mina.

“Kaufela yaka zusa kwateni kamba ku ekeza kwateni, ona zeo lika zwiswa ku yena.” Ki Linzwi la Mulena. Li yemi ona cwalo.

¹⁹⁰ “Haiba Sodoma na ka lemuha numwana wa hae, kambe na ka yema ni ka nako ye kacenu,” Jesu uli, kambe na lemuhile sina Abrahama mwa na lemuhezi.

Abrahama na zibile kuli nekuna ni sepiyo ya mwana mushimani yana taha. Kono na zibile kuli ne kuna ni kuba cincheho mwa mukwa omuñwi, kakuli na sa supezi hahulu, mi ni Sarah nali cwalo. Kono hana boni Ya Na kona kulemuha milelo ya Sarah, kwa mulaho wa Hae, a lemuha hola ya na pila ku yona. Mi ali, “Mulena ka, tuhela kuli ni ku lukiseze mezi nyana mi ni tapise mautu a Hao.” Ki habaca sinkwa. “Na Ku kupa, libelela fa nako nyana fela,” mwabona, fa, “M-u-l-e-n-a ka,” taku yetuna ya M-u-l-e-n-a, “Elohim.” A lemuha kuli Mulimu na ambola ku yena mwa mubili wa butu. A lemuha sisupo sa hae, mi a fuyolwa ki Mulena.

Sodoma na si ka lemuha lizazi la hae, mi a ciswa. Jesu naize, “Sina mone kuinezi mwa lizazi lani, kona mo ku kabela ni Mwana Mulimu ha ka . . . kamba Mwana mutu ha ka iponahaza.”

¹⁹¹ Cwale, keleke ha isika lemuha lizazi la yona. Sina Isilaele, mone ihapelelizwe kwa Palestine, ni yona ika hapelezwa mwa Katengo ka Likeleke za Lifasi. Kiñi? Ne isika lemuha hola ya yona. “Sicaba, a muzwe mwahala hae, musike mwa ikabela kwa libi za hae!” Musabise, bupilo bwa mina, kusicwalo muka swaseha mwa nombolo ya sibatana mi hakuna semuka kona kueza ka sona.

“Ya tezi masila a tale masila ona cwalo. Mi ya kenile,” isiñi *kuli uka* kena, “yali ya kenile onafa cwale. Yali ya kenile,” isiñi wa milili- . . . musali wa milili ye kutilwe; hakoni kuba cwalo. Cwale, seo siutwahale buhali, kono ao kona Mañolo. Bibele ibulezi kuli, “U shubulwa toho ya hae,” mi toho ya hae ki muuna hae. Muuna Toho ya hae ki Kreste, kona kuli musali u shubula Kreste. Ukona kuba cwani ya “shubula” mi asike aba ni “masila”? “Yana ni milili ye kutilwe a i buluke. Ni yena muuna, musali ya tina tuputula azwelepili ku tu tinanga. Ni yena ya latula Linzwi azwelepili ku Li latula.”

“Kono mutuhele ya kenile azwelepili kuba ya kenile. Yali ya lukile azwelepili kuba ya lukile ona cwalo; lona Linzwi leli lukile la Mulimu, yena Mwana Mulimu ya i ponahalize. Abe ya kenile ona cwalo, ya lukile ona cwalo!” Mulemuhe! Eeni, sha! Mazazi isiñi . . .

Keleke haisika lemuha lizazi la yona.

¹⁹² Sina Isilaele, hane i kutezi mwa naха ya yona ya sepiyo, ha i zibi mo ne i kutezi mwateni. Ne i beilwe teni fela mwani ka kuitahela fela. Kiñi? Mata a naха na i kenyize teñi.

Cwale Ni ka bulela nto yeñwi. Mata a naха kona ana kashelize Isilaele mwa naха ya habo; mata a naха aka kenya keleke mwa Katengo ka Likeleke za Lifasi; kono mata a Mulimu aka beya sicaba ku Munyaliwa. Mata a lifasi a hapeleza ka nzila *ye*, mi mata a lifasi a hapeleza ka nzila *yani*, kono Mulimu uhapeleza ka ku pahama. Moya wa Mulimu, ili lona Linzwi la Mulimu, “Linzwi la Ka ki Moya ni Bupilo,” aka beya Munyaliwa

mwa sibaka sa Hae. Kakuli, Uka lemuha sibaka sa Hae mwa Linzwi, mi Uku Kreste, aka Mu beya mwa sibaka sa Hae. Hakuna mata a naha aka eza seo. Kono mata a naha na kashelize Isilalee kukena mwa naha ya habo; mata a naha a Katengo ka Likeleke aka hapeleza katengo kaufela kukena ku zona; kono haili Mata a Mulimu aka zusa Munyaliwa kukena mwa Kanya, kuzwa ku zona.

¹⁹³ Oh, sicaba, amulemuhe lizazi la mina, sina Jesu hana mi lemusize; ka sisupo sa Sodoma, ni muinelo wa keleke wa lizazi le.

¹⁹⁴ Mutualime sa Na bulezzi kuli si ka ezahala mwa lizazi le. Muteeleze ku sona ka tokomelo luli. Sisupo sa Sodoma si ka nga sibaka mwa lizazi lateni; sisupo inge sa Abraham, zazi lani fapila Sodoma, yena na bizizwe. Ona lika ze kaufela ne li polofitilwe, kuli li ka ezahala cwale. Mutualime lizazi le mupila ku lona. Lu se lu fitile ku zona kukuta kutela.

¹⁹⁵ Cwale U sepsize ku mi lumela Liseli la Lihalimu, kuli li to buzwisa Peu ya Linzwi ye ka caliwa mwa lizazi le. Peu itemi mwahali Mo. Peu ki Bibele. Kiñi? Jesu na bulezzi cwalo. “Linzwi ki Peu yana cezi mucali.”

Mi, cwale, musi kaba kale ni sicalo kaufela, hakuna taba kamba mucala peu, ina ni kuba ni liseli fakuli ibuzwise peu, kamba ika bola mi itokwe ku kondi; ika shwa. Kono haiba ina ni peu mwa mubu, ili mubu o munde, ni liseli la lizazi le li swanelia ku yona, ina ni ku buzwawa.

Mi Na sepsize kuli mwa mazazi a maungulo, mwa nako ya manzibwana, Mwana uka taha a buzwise Peu. Peu isweli ya kutazwa. Mwana Mulimu usweli wa buzwisa Peu yeo, ka ku I bonahalisa, ku I kasheza fande fapila mina ni ku bonahalisa kuli I lukile. Kana mwa utwa njii? [Kopano ili, “Amen.”—Mu.] Mulemuhe lizazi la mina.

Na kwala cwale. Seli nako ya kukwala.

¹⁹⁶ Mi mufumi, wa sibofu, Laodesia ya itutile uka kasheza Linzwi kuzwa mwahala bona. Kana ba ezize cwalo? [Kopano ili, “Amen.”—Mu.] Na bulezzi kuli baka eza cwalo.

Sina bapolofita ba kale mone ba lumelwa ku to bonahalisa Lizwi la sepiro la lizazi la bona, ili kuli sicaba ne si lelilwe, lizazi la bona, ne ba Li boni. Sina musali fa lisima, sina Natani, sina Bartimeasi wa sibofu, sina Pitrosi, ni babañwi ba bona bene ba Li lemuhiile. Nali yena Linzwi lani. Ni muezezo, “Haiba Ni sa ezi misebezi yana sepsize Ndate kuli Ni ka eza, konakuli musike mwa Ni lumela. Kono haiba Ni eza misebezi, ni ha mu sa Ni lumeli, mulumele misebezi kanti. I ka mi bulelela Yo Nili yena.” Mwa utwa? Ku lukile, musike mwa latehisa lizazi, leli lumilwe. Baana ni basali ba mazazi asili ne ba Li lemuhiile, mi ba kena mane baba mwa buiketo.

¹⁹⁷ Mapentekota, oh, mawi, ki kabakalañi ha mu sa lemuhi lizazi la mina? Mulemuhe lizazi la nako ya manzibwana. Ki le fa, mi liteni ki le, kuli, li to paka kutaha kwa Kreste, ku to li paka. Lu kwa mafelelezo. Mulemuhe lizazi la mina.

¹⁹⁸ Na ziba kuli Ni mi bulukile nako yetetelele. Seli twelufu kiloko cwale. Kono, Na lata Sico se, Bo kona Bupilo. Ki cwalo. Ki cwalo, ku mulumeli. Lemuha lizazi leo upila ku lona, ni sisupo sa nako.

¹⁹⁹ Mutualime fo ku inzi lika kaufela: Isilaele; ko keleke; ko butanya; ko ku yemi Munyaliwa. Kiñi ze siyezi? Nto yetatama, ki ku funduka kwa Munyaliwa. Kakuli, keleke kaufela i libelezi nto yeñwi yetuna. Ba Pentekota bali, “Kanya ku Mulimu! Kuka taha lizazi le baka eza *se*, ni le ba ka eza *sani*.” Mwabona, ki baika. Ba lumela.

²⁰⁰ Sina, nako yeñwi, Kefasi naize, “Kana ha ki swanelo kuli mutu alimuñwi a shwe, mi isi ku bulaya naha kaufela?” Nali yena muprisita yomutuna, Bibebe ibulezi kuli, kona libaka ha na bulezi cwalo. Na polofita, a sa zibi mane sa na bulela. Kono kana na lemuhile niti ya sona luli, kuli na sweli kutakisa yena Mulimu ya swana yana ipulela kuli na li muprisita yomuhulu wa hae?

Kimo kuinezi, kacenu! Ba talimezi, mwabuse kokuñwi, kwa—kwa nako yetuna yetaha.

²⁰¹ Kiñi, Na bang a mwa mukopano hamoho ni Baana ba Pisinisi. Ba li, “Kanya ku Mulimu!” Bakutazi bani ba yemanga ni ku nyunga sicaba, ni kubulela kuli, “Kuna ni ancafazo yetuna yetaha. Lizoho la Mulena likaba mwa lifasi!” Ni mo batu ba zwelapili, kumata cwalo. . . Mi ha ba lemuhi kuli zeo li mwataswa Litolombita za Isilaele. Kiñi ha ba eza cwalo? Kakuli ki baika ba Bakreste, mi ha ba lemuhi. Ni yena Kefasi na si ka lemuha sa na sweli kueza. Mi ni bona haba lemuhi kuli basweli ku latula ona Liñusa luli le li lumezwi ku bona. Amen!

²⁰² Siemba kaufela sa Mañolo, luse lu fitile ku zona zazi ni zazi, mi biki ni biki, kufitela mane hakuna ya kona ku kanana ni Niti. “Haiba libofu halikoni ku I amuhela,” Jesu naize, “mu ba tuhele ona cwalo. Haiba sibofu si eteleta sibofu sesiñwi, sibeli sa bona baka wela mwa musima.” Hani zibi kuli ki lili, Hani zibi kuli ki kai, kono Ni ziba kuli za taha.

²⁰³ Mwa ziba, Na bona libaka Satani hana sa lati kuli ni eze se. Maabani, Ni ikutwa hahulu bumaswe. Ne ni si ka amuhela Linzwi ni lelikana ku Mulena. Ne ni ezize lika kaufela ze Ni ziba mwa kuezeza, kono Na palelwa. Mi kakusasana cwana, ha Ni zuha . . . Neni cile mbonyi, maabani, mi ku bonahala kuli ini katalize mwa mba. Ne ni kulile hahulu, Ni bile fela—Ni bile fela ya palelwa kuba hande. Na hupula kuli, “Ki butata mañi bobuli ni lifasi? Ni ya ni shetumuka kwani, mi ha Ni zibi se Ni ka bulela. Mi, Mulena, Hani si ka fumana nihaiwa Liñolo mwa muhupulo wa ka, kuli ni ñole. Hakuna se ni fumaní.” Ne ni sa zibi fela sa kueza.

Mi, kasamulaho Liñusa likala kutaha ku na, Satani atundamena kubulela kuli, "U ikutwa bumaswe. Toho ya hao ya opa. Wa kula. Haukoni kuya teñi kwani. Haukoni kuyema fani. Ku kaba se, ku kaba ni *sani*."

²⁰⁴ Na hupula, nako yeñwi, likande la mutu wa kwa mafelelezo a upa wa England. Nali fela mutu sina babañwi. Mi ba bulela kuli mu—mu—mu mulena, alimuñwi wa malena mwa mazazi apili na kena mwa—mwa sibaka sa hae. Mi, se, na sin ni haiba... Nana ni liñusa la na lukela ku zibahaza, neli liñusa la kapili, bakeñisa sila. Mi kacwalo kiha—kiha—kiha li ku mulikana hae yana yemi bukaufi fani, ki hali, "Inga, lwala liñusa le, nga liñusa le! Akufela kwa sibaka sa *kuli—kuli*, mi u yo laela *cwana* kuli si ezahale." Mi ki hali, "Lwala lusata lwa ka mwa lizoho la hao. Lo lu ka ku paka, kuli Ni... u lumilwe ki na."

²⁰⁵ Mi a lu comeka mwa sapalo sa hae, mi ki ha funduka. Balibeleli kai ni kai ne ba mu yemisa, mutu ufi kaufela. Na huwa, "Amuzwe! Nina ni liñusa la mulena." Amen. "Ni mulumiwa wa mulena," ki linwi le li pakilwe.

²⁰⁶ Na hupula kuli, "Satani, zwa mwa nzila yaka! Nina ni Liñusa la Mulena. Ni lukela kuya."

²⁰⁷ Nako yeñwi hane ba bulaile Mulena wa Kozo, ni ku Mu beya mwa libita, ni ku kwahela libita, mi lifu la Mu kwahela ka mazazi a malalu ni masihu. Kono ka la Zuhu kakusasana Nana ni lusata mwa lizoho la Hae, mi a huwa, "Zwa mwa nzila, lifu! Zwa mwa nzila, libita! Kwaluha! Kina Liñusa la Mulena. Nina ni kuzwa kuli ni pake zuho. Kina zuho ni Bupilo." Haleluya! Ni ikutwa bunde luli cwale.

Ki Liñusa la Mulena. Halu Li lemuheñi, balikani, kakuli lu bichelizwe ku kopana hamoho kwa kulila kwa Tolombita. "Kakuli Tolombita ya Mulena ika lila, mi nako haisana kuba teni."

²⁰⁸ U kopanyize Isilaele. Mazazi a malalu, ka lizazi la bulalu Ubulezi kuli Uka eza cwalo. Lilimo ze mianda ye mashumi amabeli ka asupile li fitile. Mwa lizazi lani la Na bulezi kuli Na ka ba kopanya hamoho, mi U ezize ona cwalo. Na bulezi kuli Uka zibahaza nzila ya Bupilo. Ki fohe cwale, ki kulibeleta fela Munyaliwa kuli azwe mwa nzila kuli bakone kutaha, bona bapolofita bababeli, bapolofita ba Maheberu, ba baka lemuha.

²⁰⁹ Mwa hupula hane ni yemi mwa Cairo, kuli niye kwani, fani Lewi Pethrus hana ize, "Muzwale Branham, haiba baka bona sani... Ba lumela bapolofita ba bona."

²¹⁰ Na li, "Ki nto yende ku na." Mwabona mutu mwa inezi? Kono mubone sishemo sa Mulimu? Se nili, "Ni balile Testamente Yenca ye." Ba I bala ni bona. Lewi na ba lumezi, ze fitelela milioni cwalo, ona kwani, Muzwale Lewi Pethrus kuzwa kwa Sweden. Neba I bala, inge ba kambama ni ku shetumuka kwani, bona Majuda bani; isiñi kuswana sina sikwata sa Majuda ba kacenu ba, kono mwa na ha ya habo. Ni ku shetumuka, ki hali, "Haiba yo

ki Mesia, ha lu mu boneñi inge aeza sisupo sa mupolofita, luka mu lumela.”

²¹¹ Lewi Pethrus ali, “Muzwale Branham, ki yeo kolo foo. Ki yeo kolo foo.” Yomuñwi na ni bulelezi kuli—kuli ikaba kolo. Ni fitile, ku yona handende luli.

Muuna yomuñwi ataha mi aina fani, Muzwale Arganbright, ali, “Muzwale Branham, sani sika nyanganyisa fela Isilae! Üba tise fapila Sona, mi u bonise sisupo sa mupolofita. Ba ka si lumela.”

²¹² Se nili, “Mulena, Ni, itukisize.” Na kwela fulai; na lwala masheleñi ni kuitekela tikiti; na yema mwa Cairo. Nali, “Eehe, Ni itukisize.”

²¹³ Moya o Kenile wali, “Se ha ki sibaka sa hao. Ye ha ki nako ya hao.” Mwabona, u itahanezi hahulu. Na hupula kuli, “Oh, mawi! Ni tile kwanu ku tofita fa; kuli Ni—Ni kaya.”

²¹⁴ Sesiñwi sali, “Yemela ona fa! Usike wa ya nzila yani. Sikuluhela cwale kwa India. Usike wa ya kafoo. Zamaya kwa India, kono usike wa ya kafa.”

²¹⁵ Na hupula kuli, “Kiñi?” Hane Ni zamaile kwa mulaho wa sitebule, Na li, “Mulena Jesu, se sitalusa sikamañi?”

Mi ki Ha ni zibisa. “Haki wa Macaba. Bapolofita ba ki balibamu.” Sina ni kuba ka Mañolo. “Mushe ni Elia bana ni kutaha.” Mi, kwanda zeo, Munyaliwa ha si ka zwiswa kale mwa nzila. “Mi bapolofita bani baka kuta mi baeze sisupo sa mupolofita.” Ao ko Mañolo. Kona fo kuka talelezwa lika kaufela he, ka kupetahala, Isilaele kakuba naha ika pepiwa mwa lizazi lililiñwi. Amen! Maseli a manzibwana a monyeha!

Ku kaba Liseli ka nako ya manzibwana,
Nzila yeya kwa Kanya muka ifumana luli;
Mwa nzila ya mezi, kuna ni Liseli kacenu,
Kupumbekwa mwa Libizo lelinde la Jesu.
Banana ni ba bahulu, mubakele libi za mina
kaufela,
Moya o Kenile luli uka kena;
Maseli a manzibwana atile,
Ki niti kuli Mulimu ni Kreste ki Alimuñwi.

²¹⁶ Lu kwa nako ya maungulo, mulikani. Mi cwale lu nahane ka pina ye ya muñoli ya susumelizwe, hana bulezi kuli:

Linaha za ikaba, (seli myaha ye lishumi ka ye ketalizoho kwa mulaho), Isilaele wa zuha,
Lisupo zene ba bulezi kale bapolofita;
Mazazi a Bamacaba a balilwe, (mutalime masila a hae cwale) ni mikoti ikatilwe;
Mukutele, haenu, Mawe mina bayambaeli.

Lizazi la kuliululwa li sutelezi,
 Lipilu za batu litezi sabo;
 Mutale ka Moya wa Mulimu, lilambi za mina
 lituke mi limonyehe,
 Muinule litoho, kuliululwa kwa mina ku
 fakaufi. (Yeo ki niti.)
 Bapolofita ba buhata ba puma, Niti ya Mulimu
 ba i latula, (Nji ha ki niti yeo?)
 Jesu Kreste ki Mulimu wa luna.

Haba lumeli Zeo. Bana ni mikwa kaufela ya lika! . . . ? . . . niti.
 Kono mupolofita uize . . . Kamba, muñoli ya susumelizwe naize:

Luka zamaya fo ku hatile ba apositola.

²¹⁷ Mwa hupula mwa pono yaka? Ne niize, “Haiba sicaba sa Paulusi si ka fita, ni saka cwalo, kakuli Ni ezize fela ona cwalo mwa na ezelize.” Ni pila fela ona cwalo ka Lona.

Mi ma milioni ani bani kambeka mazoho abona, bali, “Lu sepile ona cwalo!”

Sikamañi? Mulemuhe lizazi le lu pila ku lona, yona nako yelu pila ku yona, sisupo sa nako ye lupila ku yona. Ikona kuba tiyeho yetuna kufita mo lu nahanelia. Leliñwi la mazazi aa, ya inzi fande aineele ona cwalo fande. Ya inzi mwahali abe ona cwalo mwahali kamita. Munyako uka kwaliwa.

²¹⁸ Haiba kuna ni babañwi mo kakusasana cwana baba si ka kena kale, oh, ka Libizo la Jesu, sicaba sa hesu se silatwa . . .

Musike mwa talima mutanga wa sitimbi yo ya yemi fa, ya sika ituta, ya sina tuto, tuto ya sikolo; musike mwa talima ku seo. Kono mutualime fa Linzwi leli sweli ku pakiwa. Mutualime fa Moya o Kenile o mutuna Ya Li paka kuli ki Niti. Lu kwa nako ya maungulo. Seli likezi kufita mo mu nahanelia. Musike . . .

²¹⁹ Basali, mutuhele milili ya mina i hule. Kezeli, shangwe mutubule kwateni liapalo za masila zeo. Mu nepele kwahule makwai ao. Kakuli nako ya taha, ya kuli, “Ya masila, abe wa masila ona cwalo; mi ni yena ya lukile, abe ya lukile ona cwalo. Yainzi mwahali u mwahali; yainzi fande u fande.” Ki mulaini, o musisan hahulu, “Mbali ku piliswa ya lukile ka sisshemo fela, ukaba kai muezalibi ni ya hana za bumulimu,” ya latula Niti, mwa ziba, “bao ba kaba kai?”

Halu inamiseni litoho za luna.

²²⁰ Cwale, mwa Liseli la hola yona ye lupila ku yona, Liseli la lizazi le lupila ku lona; balikani ni balatiwa, mina ba bazwa mwa litolopo ze shutana mwahala naha, ki fo cwale, ni na hamoho ni mina, fa katala fa, halu itekuleni. U cwani Moya wa Mulimu mwa lipilu za luna kacenu? Muhupule, ki ona Moya wani, osika nyaziwa, osika tampakana; ka tuto ya keleke ifi kaufela, mi lika kaufela, li felile ka swanelo.

²²¹ Hamu lukeli kulika ku ekeza kwa Teni kamba kuzusa kwa Teni. Kakuli, haiba muka lika kubeya toloko kwa Teni, mina bañi, siemba sa mina si ka zwiswa mwa Buka ya Bupilo. Kana mulika kubulela sika seo Moya usika bulela? Kana mulika ku eza kuli U utwahale inge kuli Ubulezi nto isili? Kamba, mu Li inga fela ona cwalo mo U bulelezi, ni ku U tuhela fela ona cwalo? Kana mwa lemaka, ku pumaka, kupima, kueza lika ze si ka luka? Kona mo mu ezeza cwalo naa?

²²² Muli, “Kihande, Hani ikutwa fela kuli Ni swanelia kueza *cwana*. Kamba, mwendi, Ni—Ni—Ni ziba kuli keleke yaka ha i lumeli Zeo. ‘Leo ki linzwi fela la mutu yomuñwi ka Lona.’”

Mutu alimuñwi yo ki Mulimu. Bibebe fa ibulezi kuli hamu lukeli kukuta milili ya mina. Ze... Bibebe iize kuli. “Ku ka to ezahala kuli basali baka tina liapalo za baana, ni mo baka bela maswabiswa ku Mulimu.” Kamo Moya o Kenile no bulelezi ka zona, yena ya ishuwile, sibyana se si sa lukeli sene si yemi fela mwa lusika lona Iwana bulezi Mulena kuli, “Ki le libita la Ka, Linzwi la Ka.” (“Ki lo Lusata lwa Ka,” nitaluse.) “Nga Lusata lwa Ka, ni zeñwi cwalo, mi utise Liñusa.”

²²³ Na ziba likopano likikile ku Li paleliswa, ni ku Li kasheza kwande, ni ku Li kasheza kwande, ni ku Li lahelwa kwande, ni zeñwi kaufela. Kono, ka sishemo sa Mulimu, Ni mwa musipili waka, na huwa kuzwa naha kuya naha, kuzwa sibaka ni sibaka, kuzwa keleke kuya keleke, “Amuzwe ku zona!” Ha ki ze zibahala, kono Ki yona Niti.

²²⁴ Kikuli muka Li amuhela mwa—mwa—mwa Moya o Li ñozwi ka ona? Kikuli muka Li amuhela mwa Moya o Li filwe ka ona? Haiba mwali kuba haisali... Haluna sibaka sa kwa katala; pilu ya mina kona katala. Kana muka nanula mazoho a mina, muli, “Mulimu, uni utwele butuku na. Lumeleza Moya wa Mulimu utahe ku na, u ni nyaze cwale ka libi zaka kaufela, ni ku filikana, mikwa yaka yemaswe kaufela, ni tucimacima, ni likomano, ni lindwa, ni sizuhela, ni lika kaufela ze Ni nani. Mi Ni ziba cwana, kuli moyo wa ka ha u yo bunolo bakeñisa Lihalimu. Ni eze ya bunolo, Mulena, mwa nako ya mafelelezo ye. Ye ikona kuba kutazo ya mafelelezo ye Ni kabe ni utwa fateni. Ye ikona kuba nako ya mafelelezo ye Ni kabe ni utwa Liñusa. Ni nanula lizoho la ka. Mulimu, uni utwele butuku.”

²²⁵ Mulimu ami fuyole. Mazoho a mañata. Cwale, fa nako nyana fela ya kukuza ka tapelo ya mina. Mina baba nanuzi mazoho a mina, ku bonisa kuli mu sa na ni takazo. Ku bonahala kuna inge Moya u sa biza yomuñwi.

²²⁶ Mulimu yomunde, Wena Ya ziba lika kaufela. Mi U ezize lika kaufela ka bakala lika kaufela, kakuli, babañwi ne ba nyazizwe, babañwi neba foufalizwe; babañwi, “inge mubupi yana bupile ndondo,” sina Paulusi ha ize, “yeñwi ya kutekeha yeñwi ha ikutekehi.” Yeñwi ne ibupilwe ka bukwala, neli kubonisa fela

yene lukela ku kutekiwa. Kono hanili li mwa lizoho la Mubupi kueza Sa lata? Kana ha ki mulelo wa Mulimu wa makalelo, ku biza? “Bao Na zibile kale, U bizize. Bona Ba bizize, Uba ezize baba lukile. Mi bona Ba A ezize baba lukile, U bafile kanya.”

²²⁷ Mwendi babañwi ba bona bateni mo kacenu baba swana inge musali yomunyinyani fa lisima, ba bakeni mwa masila, ba bakeni mwa kusa lumela, ku kena mwa lizo za batu, lituto za ipangezi mutu. Mwendi ki nako yapili yebakile ba utwa litaba ze, kono sesiñwi si futumalize lipilu za bona. Kuna ni babañata, mazoho amañata a nanuhile, Mulena. Lumeleza kuli Mubupi yomutuna ange sibyana sani cwale ni ku li bupa kuba sibyana se si kutekeha. Ni lumela kuli kuna ni libaka, Mulena, kusi cwalo ne ba si ke baeza cwalo, ne ba si ke ba bulela cwalo. Ni sa lumela, Na ba yemela kwateni.

²²⁸ Tuhela kuli mutanga hao ya ishuwile akupe, Mulena. Halu ba kupeleni kwateni, inge ya yemi mwahala ba bapila ni baba shwile; inge ya na yemi mwa Sodoma yana kupela kwateni Masodoma, “Amuzwe mwateni! Amuzwe mwateni, kapili!”

²²⁹ Haba tahe, Mulena, ka buikokobezo mi hamunati lutahe kwa lubona lwa Mulimu cwale, mwa lipilu za bona, bali, “Jesu, kuzwa lizazi la kacenu, kuya kwapili, Úkaba wa ka. Ni ba ni buitamo bo ku Wena cwale fa, sina Hani inzi mwa sipula se ko Moya wa Hao uni natile. Haiba U ni natile fa, Hani lukeli kuya kwapili ni hanyinyani kufita fa. Ona fa kona fo Uka ni katanyeza; ona fa kona fo luka ineleta; ona fa sipula sa bubeli se, sipula sa bulalu, sipula sa bu ketalizoho, seo kaufela sili sona. Ona fa kona fo li ka ineleta, kakuli fa kona fo Ni nyazelize, fa kona fo Ni sepiselize kuli ni lukise lika. Kakuli Ni ha ni kaba ni tampakani kamba ya nani masila, Ni ka fetuha yomusweu sina litwa. Ni ka lumela Linzwi la Hao kaufela. Ni itukiselize kukena mwa Teni, na Li lumela, ku Li amuhela.

“Mi Ni eza se cwale kwa kanya ya Mulimu, ka kuziba kuli bupilo bwaka ha ki bo bunde kuna, ha ki bo bunde ku Mulimu, ha ki bo bunde ku bo ni bapani ni bona, ha ki bo bunde ku zeñwi kaufela; ki zende fela ku diabulosi, kuli ani eze kuba—kuba sibapaliso, kuli ani kasheze kafa ni kafa, mwendi kuba sipupe sa mutu se ba kona kubuha, mwendi ikona kuba kalimu ka musali. Mulimu, ni eze mutanga ku Wena.” Lumeleza cwalo, Mulena. Ni ba beya ku Wena cwale, ka Libizo la Jesu Kreste, Mwana Hao.

Ni litoho za luna ze inami, ni lipilu zaluna.

Ni utwa Mupulusi wa ka . . .

Ka ku sepahala, mulikani. Ikona kuba hola ya hao ya mafelelezo. Kana mwa utwa Linzwi le li sisani lani?

. . . wa biza,

Ni utwa . . .

Ki sikamañi sa biza...Ki sikamañi se si mi biza, kanti ki Mupulusi wa hao? Yena Linzwi.

. . . Mupulusi wa biza,

Ki sikamañi se muna ni kueza? Kuhana lifasi.

Ni kulwala sifapahano saka ni ku ni latelela,
ku latelela . . .

“Ni tohohile kolobezo ya Libizo la Jesu, Mulena.”

Nika ya ni Yena kukena mwa simu,
Ni kaya . . .

Ni Yena, kakai? Kukena mwa mezi, kukena mwa simu, kukena kai ni kai; ndu ya tapelo, mwa siliba, kai ni kai. Mukete cwalo!

. . . kuya ni Yena mwa simu,
Ni kaya ni Yena, ni Yena nzila kaufela.

Ni kaya ni Yena mwa katulo (ko kuna ni Linzwi
le li lukile kamba keleke ye lukile),
Nika . . .

“Kamba Ni ya lukile, kamba U lukile. Kana maikuto aka a lukile nji, kamba kana Linzwi la Hae li lukile?” Mu mwa sibaka sa katulo cwale. “Ki sikamañi se Ni lumezi, kana ku lukile, kamba Linzwi la Hae li lukile? Kana mu nahana kuli ki hande kuba ni milili ye mikuswani, kutina tuputula? Kana Ni nahana kuli ku lukile ku fumaneha kwa kopano nji?” Ki sikamañi sa Na bulezi?

Ni kaya ni Yena, ni Yena nzila kaufela.

Cwale kaufela ko Aka ni isa Ni ka latelela,

Ni nanuzi mazoho aka mwa halimu, nina, Mulena. Mulena, kamba ki kai kaufela, ki kai ko kuka kutalezwa Liñusa le litatama? Kana ki kwanu nji, busihu boo, kwani mwa Africa, Germany, Switzerland? Ki kai, Mulena?

Ko Akani . . . (kaufela ko Ni etelela,
Mulena) . . . na Ni ka latelela,
Ni kaya ni Yena, ni Yena nzila kaufela.

Cwale ni litoho za mina ze inami.

²³⁰ Kana mukaya ni Yena kai ni kai ko Aka miisa? Kana mukaba ni Yena fo linako ha se liya lifela, sicaba sa nyandisa, ku seha, kubona bukuba? “Nika na ni ba ni Yena. Ni ka zwelapili kuya. Ni ka zamaya ni Wena, Mulena, kaufela ko Uinzi. Ni kana ni yema ka likute ni niti. Mwa kukolota kwa ndwa, niteni Ni ka yema ka likute ni niti. Haiba Ni wa, Uka ni zusa hape, Mulena. ‘Ya latehelwa ki bupilo bwa hae ka bakala Ka uka bu fumana.’”

Kacwalo Ni ka ya ni Yena, ni Yena kaufela . . .

²³¹ Cwale kaufela baba talusa cwalo, kuzwa mwa pilu ya hao, halu nanuleñi mazoho a luna, ni lipilu za luna, ku Yena.

Ni... Kwa Ni isa Ni ka latelela,
 Kwa Ni isa Ni ka latelela,
 Kwa Ni isa Ni ka latelela,
 Ni kaya ni Yena, ni Yena nzila kaufela.
 Uka nifa sishemo ni kanya,
 Uka ni fa... .

Mulena Jesu, bululela fa litaulo ze cwale. Folisa bakuli ba ni baba imezwi, Mulena. Lumeleza cwalo, Mulena. Ba fe foliso, Mulena, ka Libizo la Jesu.

Ni kuya ni na, ni na nzila kaufela.

²³² Mwa utwa hande cwale? [Kopano ili, “Amen.”—Mu.] Mu ikutwa kuli ku lukile cwale? [“Amen.”] Haiba Uka... .

Tolombita ya Mulena haita lila, ni nako haita fela, (yani kona Tolombita ya mafelelezo, cwale)

Mi kakusasana halita pazula Kokusafeli, kokunde mi busile hande.

Halu iopelefni, kaufela luna cwale. “Tolombita ya Mulena haita lila.” Aku lufe munembo.

Tolombita ya Mulena haita lila, ni nako haita fela,

Mi kakusasana halita pazula Kokusafeli, kokunde mi busile hande;

Fo baba pulusiziwe ba lifasi habata kopanela mwabuse,

Muta mabizo a bizwa kwani, Ni kaba teni.

Muta mabizo a bizwa kwani,

Muta mabizo a bizwa kwani,

Muta mabizo a bizwa kwani,

Muta mabizo a bizwa kwani, Ni kaba teni.

Kakusasana omunde wani ko kusina malu fo baba shwezi ku Kreste ha bata zuha,

Mi ba ta ikabela kanya ya zuho ya Hae;

Mi lika kaufela za bupilo halita fela, ni musebezi wa luna ufela,

Muta mabizo a bizwa kwani, Ni kaba teni.

Muta mabizo a bizwa kwani,

Muta mabizo a bizwa kwani,

Muta mabizo a bizwa kwani,

Muta mabizo a bizwa kwani, Ni kaba teni.

²³³ Halu nanulefni mazoho a luna, luli, “Ka Sishemo sa Hao, Mulena.” Ka Sishemo sa Hao, Mulena! [Kopano ili, “Ka Sishemo sa Hao, Mulena.”—Mu.]

Cwale, luna lu mizwale ni likezeli ku Kreste. Halu fetuheñi fela ni ku swalana mwa mazoho ni yomumu, mi lu bulele kuli, “Ka tuso ya Mulimu, muta mabizo a bizwa kwani!”

Muta mabizo a bizwa kwani,
 Muta mabizo a bizwa kwani,
 Muta mabizo a bizwa kwani,
 Muta mabizo a bizwa kwani, Ni kaba teni.

Ki sikamañi se lu libelela?

Tolombita (ya mafelelezo) . . . ya Mulena haita
 lila, ni nako haita fela . . .
 (Hase lukeni mwa Kuyakuile, "Mwa nako
 nyana, mwa ku kobya kwa liito.") . . . mi
 kokunde;
 Fo baba pilisizwe ba lifasi habata kopanela
 mwabuse,
 Muta mabizo a bizwa kwani, Ni kaba teni.

Halu iopeleñi fela!

Muta mabizo a bizwa kwani,
 Muta mabizo a bizwa kwani,
 Muta mabizo a bizwa kwani,
 Muta mabizo a bizwa kwani, Ni kaba teni.

²³⁴ Oh, kana yani haiba kuba nako! Ki ku zamaya fela cwalo, zazi leliñwi, mi fa kipeto ku bonahala yomuñwi. "Ki mañi yani? Boma!" Amen! "Hakuna kunga nako cwale." Mwa mizuzu yelikani fela, mu cincizwe. Mi luka ba . . . luka kopana ni bona, mi ni kungelwa hamoho ni bona, ku kopana ni Mulena mwa mbyumbuyulu. Oh, mwa nako nyana, mwa ka kuboya kwa liito. Ali, "Ki yo Muzwale Seward, muzwale wa kale na banga kwa keleke kwanu! Kiñi, ki yo fa Muzwale DeArk. Ki yo fa Muzwale Wa- . . . Kiñi, mutualime kwanu, kaufela baní beile mwahali! Ki butata mañi? Kwanu mwa mizuzu yelikani fela . . . Ni ziba kuli ba bonahalile kuna. Hanina kuba ya liyeha hahulu cwale. Ni ka cinciwia cwale, mwa nako nyana fela, mwa muzuzu fela." Oh, eeni! Mi kakusasana halika pazula Kokusafeli, kokunde mi busile hande. Malu kaufela a sa zibahali . . .

²³⁵ Sina ha Na bulezí kuli, "Isilaele, wena u swana sina lilu la kakusasana, la puka, mi kuluka kwa hao kwa yunda." Mi kaufela ha li felezi mwa Liseli la Mwana Yena ya liswelí kaufela, amen, kipeto, "Mabizo ha ka bizwa kwani, Ni kaba teni." Ku lukile.

Kufitela busihu kacenu:

Kufitela lu kopana! Kufitela lu kopana!

Halu zibi kuli se sikanga nako yekuma kai, balikani. Seli likande, la nako yetelele, kono ki Niti, mi si ka ezahala. Lu kwa nako ya maungulo cwale.

Kufitela—kufitela lu kopana, kufitela lu . . .

Ka sishemo sa Mulimu, lwa sepa, ka sebene seti busihu bwa kacenu.

Mulimu abe ni mina kufitela lu kopana hape.

Ki fo halu yemeñi cwale.

²³⁶ Oh, haki bunde nji? “Ze ki libaka za Lihalimu ku Kreste Jesu.” Halukoni kuyolisa se kwa lika zeñwi. Mwa ziba mo Ni latela kuyamba ni mo Ni latela kuzuma, kakuli Ni bonanga Mulimu kwande kwani mwa mishitu. Na lata cwalo. Kono, oh, Hanikoni ku cinca neba fa muzuzu ulimuñwi ka se, ka zibo kaufela ya myaha ye mianda anda. Muzuzu ulimuñwi wa se, ki kukatuluha luli!

²³⁷ Mulimu, bupaancafazo kuna. Tuhela kuli nibe ancafazo. Tuhela kuli mañi ni mañi wa luna abe ancafazo, ancafazo kuna. Uni konise, Mulena, kuba ni tala, uni konise kuba ni linyolwa. Bupa ku na, Mulena, luli se sitokwahala kuna. Ni tuhele, kuzwa yona hola ye kuya kwapili, ni be wa Hao; kuba mutanga ya ipile hahulu, mutanga yomunde, ya fuyozwi hahulu ki Wena; yakona hahulu, ya ikokobelize hahulu, yana ni sisshemo hahulu, ya itakaleza hahulu ku beleka; ya talima hahulu kwa lika zende, ni ku libala lika za kwa mulaho, ni ze maswe. Tuhela kuli ni ikataze kuya kwa pizo ye pahami ya Kreste. Amen.

Yeo kona takazo ya luna, nji cwani? [Kopano ili, “Amen.”—Mu.]

Ku lukile, kifo, kufitela lu kopana busihu kacenu, ha lu ngeni Libizo la Jesu koluya cwale, mañi ni mañi wa luna cwale.

Unge—unge Libizo la Jesu ko uya,
Mwana wa manyando ni bumai;
Lika kufa tabo ni mbombolelwa,
U linge kaufela ko uya.

Libizo Lelinde, O kwa munati!
Sepo ya lifasi ni tabo ya Lihalimu;
Libizo Lelinde, O kwa munati!
Sepo ya lifasi ni tabo ya Lihalimu.

Cwale halu inamiseni litoho za luna.

Unge Libizo la Jesu ko uya,
Kuba tebe kwa sila kaufela;
Mi miliko ha i kubeya mwahali . . .



KULEMUHA LIZAZI LA HAO NI LIÑUSA LATENI LOZ64-0726M
(Recognizing Your Day And Its Message)

Liñusa le ka Muzwale William Marrion Branham ne li kutilizwe lwa pili mwa Sikuwa la Sunda kakusasana, Sikulu 26, 1964, ili fa Branham Tabernacle mwa Jeffersonville, Indiana, U.S.A., liingilwe kuzwa fa tepu ya magesi ya manzwi kusina ku zusa sika mwateni ku ya Sikuwa. Toloko ye ya mwa Silozi ne i hatisizwe ni kuhasanyiwa ki ba Voice Of God Recordings.

LOZI

©2018 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org